



華泉集七

碑  
墓碣銘  
墓表  
墓誌銘

16  
1034  
7



和16  
1034  
卷



華泉集卷之十三目錄

碑

烈女徐氏旌閭碑

孝子 贈持平芮公 歸周 遺墟碑

墓碣銘

高麗工曹典書趙公 悅 墓碣銘

孝子李公 晉彩 墓碣銘

副護軍朴公 壽一 墓碣銘

贈左承旨朴公 師亮 墓碣銘

學生孫公 縝 墓碣銘

井田康公 遠墓碣銘

學生安公 載迪墓碣銘

進士 贈弘文館校理栗亭崔公 鶴齡墓碣銘

學生金公 樂聖墓碣銘

處士旺林李公 行祥墓碣銘

典籤鄭公 儁墓碣後記

墓表

高麗知密直司事陶隱李先生 崇仁墓表

元翰林學士高麗昌原伯孔公 紹墓表

有心齋李公 和甫墓表銘

太古文公 希舜墓表

縣監趙公 宗喆墓表

縣監 贈參議鄭公 胤獻墓表

參議著菴俞公 漢雋墓表

孝子朴公 需墓表


贈弘文館修撰辛公 德羽墓表

華泉集卷之十三

碑

烈女徐氏旌閭碑

正統戊午我 莊憲大王命旌徐氏閭曰烈女復其  
 戶仍賜 御製詩二絕於是徐氏之烈顯於世而  
 聖祖褒美之典無餘憾矣舊有碑今剝蝕不辨其後  
 孫必九謁余以新之謹按三綱行實徐氏豐基人郎  
 將思達女嫁同郡都雲峯一年夫死哀毀常日就堂  
 後竹林抱竹號泣一日生白竹三叢三年至七八叢  
 又按軍威邑誌達城家牒亦云事聞圖白竹以進遂



有是 命特賜夫人帖舊碑所稱貞夫人必據此而言顧未有明據至其雪中生魚之從空自落門傍苴杖之發葉還生固亦孝烈所感而無文獻可徵然白竹一圖已奇矣至徹九重之 覽奎章燦爛與瀟湘淚痕并美千古其他又何必言雲峯考曰高麗進士俞 太祖以微時交累徵至大將軍不能奪其志御筆扁其堂曰青松遠祖彌妻亦不屈於百濟王其事又載三綱行實都氏之門忠烈一何多也嗚呼休哉并記此俾刻其陰 御詩二絕鐫于其左右以別榮褒云

孝子 贈持平芮公遺墟碑

商山有里名回龍者卽故芮公諱歸周字讓卿遺墟旣沒之四十六年癸酉朝廷 贈公職司憲府持平以孝也公晚年別有金陵之築商與金遺墟等耳是碑也不於彼而必於是者何也以公生長皆於是奉養二親亦於是故不忍無傳將使千百世之下猶識其爲孝子攸宅而里中後生無貴賤感發激勵得以興於孝興於悌則一片之石雖小其有補於世教亦大矣是安可無記也公性至孝三歲已知愛敬父母當哺乳輒跪吮之纔受學先問孝親之道日誦孝經

常終日侍側婉愉其容色先意承奉甘旨無闕出必告反必面親齋衣不解帶嘗糞露禱又嘗口噓肛門納以溫氣病果良已後又割指進血五日而甦前後喪六年只歡粥其祭也情文備至晨昏上墓哭未嘗或廢人感其誠或爲之掃雪開逕樵牧亦爲之撤歌不忍以斧斤入焉及其老不得省墓則就家後爲壇朝夕望拜以寓終身之慕遇 國忌必茹素嘗赴會圍聞師喪不試而歸彼父子君臣師生之際不能盡其道者視公果何如也世之指公爲一節者可謂淺之爲知也公之曾孫秀謙屢造余袖示名公卿大夫

所爲詩若文贊公事行者而仍屬余一言以刻其陰余自惟托名爲幸何敢以陋拙辭謹書此以塞其請至其得虎餘之瘡傳親瘡獲神效是固有是理然除非水鯉幕雀見載朱夫子小學書者人未必信近世言孝者類皆以此等爲例便不新奇余故畧而不書獨詳於實行如此是亦衰世之意云

墓碣銘

高麗工曹典書趙公墓碣銘

高麗典書趙公諱悅咸安人年代旣邈文獻無徵字號及生卒履歷皆不可攷謹按咸州志曰趙悅三司

政堂文學烈之玄孫始居平廣後移山八里院北洞  
善琴畫月夜彈琴聲聞數里畫亦流傳於世又按其  
世譜有曰棄官歸鄉專心所事又曰恭愍朝官至工  
曹典書逮我 聖祖龍興以嘉善大夫工曹典書徵  
而不復仕嗚呼當勝國之末圃牧尚矣其餘往往泯  
其跡以自晦甘與草樹同腐公豈其人歟 端廟時  
公之孫旅在太學揖諸生歸終身不復出是所稱生  
六臣漁溪處士 贈吏曹判書就伯夷山下建祠與  
五公者享焉公之四百年湮而不章豈亦有幸不幸  
存焉耶向所謂琴畫是真有托而逃焉者而其見於

世譜者亦引而不發若有待乎後世之子雲及孟文  
貞思誠所爲洪晚隱載之狀出而公之隱德微行稍  
稍始顯其狀畧曰一夜判書成萬庸評理事卜贊博  
士鄭夢周典書金成牧大司成李穡等不期而會把  
酒論懷牧隱曰殷有三仁比于死微子去箕子爲奴  
各自隨意行之皆曰諾晚隱遂決意歸田至三嘉大  
坪村卜居命名爲杜尋洞惟咸安人典書趙悅進士  
李午常以竹杖芒鞋相往來以傷時事其後麗祚訖  
與二公會唁于雲衢仍以悲歌哀詠而歸人譬之麥  
穗採薇之歌云嗚呼晚隱之狀殆若爲公而發豈非

天哉且其盍簪聯句幽篁園裏數叢花潤色山村寂  
寞家入室更看樽有酒宦情從此薄於紗其辭愈婉  
其跡愈微其志愈堅於是乎公之爲公庶幾俟百世  
而無疑矣宜其以漁溪爲孫也公墓在防禦山東麓  
乾坐原後夫人蔣氏祔元配田夫人墓失傳公之先  
三世曰密直使三司左尹諱禧曰參軍 贈參知政  
事諱之興曰版圖判書諱天啓公之四子曰彛神虎  
衛曰寧縣監曰桓曰安不仕安之子曰漁溪後孫幾  
累千數或以名節或以經術而著焉又有以文行名  
於世科宦顯於朝多不能盡記而國有寇亂又多前

後立懂世稱一門十忠噫其盛矣豈不是公之遺風  
餘教有以啓牖之也近有大石出於公墓下其尺度  
正合於大碑是必漁溪以下諸公爲之磨礱運置以  
待夫後之人也石微物也而與公之顯晦同其終始  
尤豈不異哉諸子孫將謀豎隧道求余爲記實之文  
采何敢當采王父陶菴文正公於漁溪碑銘誦石潭  
先生之言而結之曰使後世不復知有金時習抑何  
憫焉亦可謂得公心矣然公之所秉大義卽所謂撐  
天地亘萬古而不能易者公雖欲自泯其不可泯者  
天也采於公亦以是結之可乎雖然公私秘藏愈久



愈出則公之事實終必有大顯之日盍姑俟之顯晦有數遲速有時銘曰

跡公之世哀彼黍離誰與友者其歌也悲有孫餒食伯夷山下厥後忠賢一何盛也晦而後顯亦理之常我銘斯石用昭無疆

孝子李公墓碣銘

余爲孝子銘多矣類皆有雙鯉黃雀之感輒沉吟久之方下筆及得鄭斯文穆所爲李公晉彩狀讀之鄭斯文賢士其言宜可信况其實心實行無一毫勉強虛僞有足感服人者今於樹墓之文遂不辭而樂爲

之敘公星山人字子明天性孝自五六歲已知愛親怡柔聲色不離其側父病輦罕言其所欲爲乃以心嘿契先意承奉爲其所嗜在川魚红柿每竭力供之未嘗廢釣網嘗與鄉人之讌見其柿甚美遂手擎而歸恐其壞敗足縮縮舉前曳踵直趨三十里獻之嘗曰事親者不可不知醫於是學岐黃術極其精有疾輒嘗糞隨證投藥卽收神效又嘗供安峯寺佛歲以爲常有老僧語人曰彼爲夫婦子女祈福者滔滔也獨東山李公祈其親壽考康寧餘外無他語真孝子哉當癘氣熾日焚香禱天雖比屋犯染而公之家獨

免焉是故父年九十有八歲尙能康健公亦年近七十左右養便敏如孺子貴家子弟慕醫名雖厚幣要之必辭以親疾或出亦未嘗經宿及喪葬祭一遵禮制三年食素日必省墓攀擗號踊人皆大悅過其居必問李孝子安在弱冠遭母艱常以爲至痛語及輒流涕仍遺戒子姪曰吾母死不得用厚棺吾死須用薄板每當慈諱倍爲之悽咽祭需必一一躬攝以致如在之誠常恐羞辱及其親未嘗以惡言出諸口暴怒加於人每諄諄以孝道訓家一室之內婦孺僮僕皆知事親當孝鄉隣有不孝者往往感化乞不令李

公聞之辛亥八月以疾卒于東山距其生癸卯六十九葬馬堂山卯坐原公系出高麗樂居副正諱德富代有簪纓星山六李人稱副正之李最著高祖緄會祖亨遇考夏蕢皆同知中樞三世以壽職貴世所罕外祖海平金湏配原州元養浩女無育以弟圭彩子光旭爲嗣嗚呼孝固子職分當然而跡公事行一出於至誠深愛禱天供佛使其親安享期頤之壽孰不曰孝哉有是子余嘗官于知川與公居接壤時則公盖無恙而恨未及登堂而禮焉公沒後朞年公議齊發累呈營邑尙未有旌褒之典以公而泯滅則何以

爲爲善者勸是必有受其責者銘曰

繫有行源天感心香兒頭已白翁髮復黃敢言其老  
洞屬在傍吾盡吾職不知何傷化固已行若古彥方  
是亦爲政自家而鄉彼四尺者孝子攸藏毋或夷之  
視此銘章

副護軍朴公墓碣銘

尙記壬子之夏余在知川朝廷 賜祭朴摠管孝參  
其家家山清余以執事赴仍見其諸子孫復講舊好  
後六年摠管之孫熙震訪余于中州請以其兩世先  
碣曰此吾父遺意也噫逝者之意其忍負諸公諱壽

一字享諸大耄通政卽摠管曾大父公以 仁廟庚  
辰生早習詞章九捷鄉解人謂朝夕且一第晚年遂  
廢舉閒居養精自號安樂窩從容游藝諄諄然教子  
孫奉先接人各盡其宜平生不見不正之人不作無  
益之事處貧窮怡然也年八十九戊申十月十一日  
卒趙相國道彬誄之曰自躋緋玉修天爵終老林泉  
作地仙以其十二月葬于縣北屯洞芳谷負兌之原  
先兆也公凡再娶晉陽河氏監察璿女延安李氏宣  
教郎友仁女并 贈淑夫人河夫人同麓異瑩李夫  
人有閨範以己丑三月十五日卒祔公墓二男二女

師亮生員志亮盧世勛魚翼龍皆李夫人出長房男  
鳳徵鳳儀鳳來鳳齡鳳德鳳祥次房男鳳朝鳳彩師  
亮鳳徵以孝參貴 贈承旨參判內外曾玄近百餘  
人熙震父顯東有孝行潘南之朴遠有圭組入本朝  
孟智號春塘官至校理歷四世有諱文樸生員酸食  
西湖諱以懌諱尙圭生員是公以上三世皆以文行  
名終老于臥龍精舍有尙友隆中之意士大夫高其  
風致妣清州韓氏察訪夢參女銘曰  
三世龍湖一鄉善士其後也昌餘福在是

贈左承旨朴公墓碣銘

英廟己巳進士聾嘿軒朴公師亮字重明壽七十六  
夫人安東權氏亦七十七時孫孝參已文科方爲郵  
官以回香在是歲設慶席而樂之衆子孫蕃衍盈堂  
公酒酣自賦詩曰四代夫妻同處室一床蓮桂更回  
春人莫不艷嘆而和之越五年癸酉十二月七日公  
卒後十二年甲申七月十二日夫人又卒以孝參貴  
贈公承政院左承旨夫人從 贈如例公系出潘南  
高麗戶長應珠其鼻祖本朝有諱孟智官校理以學  
行祠于龜川歷數世代有簪纓生員諱文樸號龍湖  
朴氏居山陰之龍湖自公始早遊寒岡之門有盛名

及卒祠西湖生諱以懌中生員旋罷榜與鄭畸翁從遊號省愆齋生諱尙圭亦生員自號鏡川卽余祖文正先生銘其碣者生諱壽一大耄通政卽公之父外祖文清公青蓮李後白之後宣教郎友仁也公以顯宗甲寅生幼而聰穎父呼韻使賦卽景公卽援筆對以杜鵑花落海棠開時年七八歲一座驚嘆又善草隸詞章六體無不通達最其詩文平易筆法端妙出入場屋三十年人皆傳誦而取法焉然晚始上庠終未克大闡者命也性孝遭內外艱盡其情禮當諱日齋沐將事哭泣如袒括初平居左右圖書排置齊

整取古聖賢訓辭手寫揭壁口不言人長短朝廷得失非惟不言亦不欲聞其所稱聾嘿自警也雅好佳山水遇輿輒陶寫就濂洛及先賢文集撫其要而步其韻有嘿老枯唾四卷藏于家權夫人通德郎致亨女端淑有法度奉君子不懈合葬于縣北芳谷壬坐原六男二女鳳徵鳳儀鳳來鳳齡鳳德鳳祥李汝玉郭弘績鳳徵一男卽孝參官至副摠管一女鄭弘毅鳳儀男孝彥女郭弼東安琬姜箕成鳳齡男孝曾孝元孝貞孝會後鳳來女柳垠姜箕應李運泰鳳德男女孝益孝淵金璘安德明文祖光李祖興孝昌劉彥

邦妻鳳祥出內外曾玄不盡記顯東子熙震實尸公  
祀孝元子榮東文科今注書熙震以其父遺意謁銘  
銘曰  
自謂其聾不聾於泉聲鳥語自謂其嘿不嘿於咏詩  
讀書吁嗟乎白首邱園雖不得於人而得於天如此  
夫

學生孫公墓碣銘

有奮起遐陬能志於聖人之學而私淑大賢之門以  
實心實行洽然爲一鄉模楷者孫公縝真卿其人也  
上祖諱贊政堂文學修文殿大學士諱執經大司成

歷幾世有曰弘道曰汝獻曰復立即公會祖祖若父  
父早歿公世家長淵淵海邑也其俗僻陋不知文墨  
爲何事然自李文成先生繼開以來稍稍知斯學之  
可尊公母綾城具氏始教之義方及長出而遊鄉塾  
博涉經史家置訓蒙齋誘掖鄉秀子弟甚勤三十年  
如一日尺疏籲天首建朱夫子院以文成配食學規  
自公草出永爲藏修之方蓋其自治治人多石潭遺  
範而生員進士者往往出其門學者推之爲鄉先生  
其事親也愉色婉容克盡志物之養其喪也泣血三  
年忌日必獻賢以致其誠處兄弟無彼我與同衣食

此行誼之著者九試發解在公爲餘事以若人終於  
泯泯惜也然觀察使以聞遂命復其戶猶賢乎刺  
史不能薦天子不聞名聲者歟觀其所爲遺書戒子  
孫者九條凡爲人之道備矣其學正其辭懇有足以  
激勵孚感信乎讀書之力不可誣也某年月日卒距  
其生爲幾年墓在銅峴良坐原前後配白氏金氏五  
子萬齡萬迎萬遂萬達萬逸進士文科縣監庶出萬  
堅孫九人曾孫十有五人多不能盡記請余文者思  
儼之子慶魯思行之子範魯思儼萬迎出思行萬達  
出云銘曰

彼貿海曲知所當勉卓有行誼斯謂之善微公之奮  
孰破天荒推以及人爲準于鄉

井田康公墓碣銘

公諱遠字仲鴻自其幾世祖判掌隸院事諱俊世居  
箕城公奮起遐陬知有古人爲己之學篤志力行下  
學而上達若日月星辰之度山川草木之名亦靡不  
旁通蔚然爲一路之望年八十五卒于井田精舍學  
者號曰井田先生鄉人比之關西夫子嗚呼古所稱  
豪傑之士公非其人歟康氏出谷山高祖諱銖以薦  
拜齊陵參奉諱時灝諱燁諱宇夏皆以孝友稱卽

公三世而外祖密陽朴燧也公甲午十二月廿九日  
生體幹壯大志氣卓犖九歲患痘危謂父母曰烹二  
鷄來卽與之曰非我也欲父母食而蘇其憊也及長  
師事吾王考文正先生千里負笈慨然求道先生許  
以雋才公每春秋來往不失其期蚤夜講誦必有常  
業自小學四書五經至心經近思錄諸書皆循序而  
探蹟焉嘗入香山半年徹夜讀不輟其老經僧自以  
爲不可及然其爲人穎秀俊發於書或畧綽看便謂  
已了先生戒之曰沉着痛快是君用力處公謹守而  
不失焉日必晨興謁廟退整衣冠對方冊終日危坐

不少倦先生嘗書示義理之心頃刻不存則人道息  
高山仰止四養六有等語公書揭座右一日一誦以  
自省真積力久充養有道是以向之矜持者純熟嚴  
厲者和平疏食糲飯至樂自在繩行尺步容止可觀  
儼乎其道立之君子矣其居家篤於孝友親喪廬墓  
致哀其丁外艱年旣耆艾而執禮愈固祭必誠慎不  
問家有無四時之享必深衣幅巾於先世墓道賣田  
豎表以及旁親有季父生同年事之如父御家以嚴  
子弟不敢闕語於前而其友于也怡怡或有不可教  
者亦處之以善道自然歸服蓋其日用常行不本於



小學者幾希而先生之喪喪三年爲校讎遺文累會寒泉亦一事之義也其教學徒必以先生所以教公者教之自治而治人嚴立課程嘗秉拂於仁賢書院每朔設講問難又行飲射禮使諸生觀感嘗曰開天下萬世太平者孔子也開東方萬世太平者箕子也宜特立祠於文廟之傍草疏而未果上校宮享祝議去年號以明尊攘之義著井田關防說以備需世之策要之皆可行無疑也辛亥因上旨進易學傳義考禮說合幾冊始公拜崇靈殿參奉不就前後道伯又以經行累聞于朝間擬康陵參奉至是又登薦

剡有是命蓋將用之而公老矣其爲通政至資憲者皆壽秩也於是冠蓋之道箕城者多聞風造門願一見其面而諸先生如朴公聖源俞公彥鏤金公元行金公亮行以同門與道義樂與之往復問辨觀於諸公之賢可以知公也夫公之卒在戊午十二月廿六日墓于紫陽洞先麓負壬之原配遂安李氏祔司藝萬春孫也一男龍悅二女黃鎮輔林潢龍悅二男寅寬黃婿無子林婿子道根達根寅子信恒寬子信德公所著詩書碑狀雜著四書講說井田說歷代編年藏于家如傳義考十六冊最是公平生精力云公

卒後數年門徒謀豎石使寬屬銘於采今寬又死可  
悲也銘曰  
奮身於猷畝之中而慨然從師玩心於經籍之內而  
俛焉爲己德容儼拱世皆仰之以偉人道章交薦  
上亦知其爲賢士嗚呼西土之人毋或夷之其墓在  
箕子之都紫陽之里

學生安公墓碣銘

安公載迪初諱曰載泰自曾祖諱悟祖諱堯佐世居  
果川之良才里生老死葬皆於斯有二子衡衢皆進  
士伯後爲參奉老職僉樞與其弟從吾王父遊有聲

士友間公亦弱冠從以學焉公僉樞子也余故得識  
公而猶未詳也他日嘗往侍大齋俞先生先生之季  
忠文公彥鎬時以尙書在座適公開戶而入先生兄  
弟起而迎把酒懽如與之言必呼曰仲勸仲勸公字  
也余於是心驚異之以爲公一布衣耳其見敬禮如  
此欵洽又如此是必有所取也徐而察之雖不規規  
於繩尺蓋孝友篤行之士也安氏出順興文貞公軸  
文簡公宗源良度公景恭靖肅公純文肅公崇善連  
五世大顯文肅四傳而有縣監世寬已卯士流是爲  
公六代外祖同中樞朴震龜也公以 肅宗癸巳生

以 正宗丁未十二月十六日卒越三月丁其坐而  
葬公初娶全州李氏德基女有婦德廓及李百裕其  
男女再娶陝川李氏元裕女廩又其男也而出後其  
季父方爲沃溝縣監廓男其性廩男其命其宅側出  
其義其職李婿男得魯女尹命烈始公七八歲時值  
先忌適遊戲於外有老婢見之曰祖父母方以喪餘  
悲痛郎獨何樂而乃爾公赧然而歸自是遇祭祀齋  
必加長者居前後喪情文備至三月啜粥三年不肉  
如禮每諱日沐浴致誠夢見所爲祭者友其季旣沒  
而語及之猶泣撫愛從姪之孤者教督甚勤曰不如

是無以見叔父於地下推以至遠族亦睦少習功令  
家文屢解而竟不成疾且亟猶誦彀鯁浩然章傍人  
諫止之則曰以是收斂精神不爲疲也嗚呼其可敬  
也已廩使其命請曰先先生旣銘吾二祖銘吾父者  
非執事耶余不敢辭銘曰

鬱彼阡世其葬誰爲銘我文正嗟善士從于先托名  
榮又余鐫

進士 贈弘文館校理栗亭崔公墓碣銘

人於科宦其未得而患得旣得而患失者蓋滔滔也  
進士崔公鶴齡魁 中廟已亥庭試獨以 御賜紅

善身集 卷之三  
牌有字誤士初出身不可苟受乃固辭請還之得失  
有不卹也廷議顧不一 上以特教可其言浩然以  
布衣歸鄉里時年二十八非光武不能成子陵之高  
豈謂是歟從河西金先生遊講磨道義遂絕意榮進  
雖其顯晦不同若公微旨則與金先生一揆云及其  
卒 贈弘文館校理與八賢同享于慕菴祠於是乎  
公之名與迹不泯矣然孝者行之源而公實有之其  
賢益可知已公字雲老因其所居而自號曰栗亭十  
六發鄉解父母賞以田民公曰患不能立揚不患無  
生理今以一解受賜奈姊妹兄弟何其辭受之不苟

已如此其爲進士則在甲午公家傳孝友世守文學  
其平居言動事爲皆有常法讀書之暇不離親側日  
以爲娛樂及鄭孺人喪顏色哭泣使吊者悅啜粥枕  
苦一如禮旣葬廬于墓距家百有餘里寢郎公懼滅  
性欲其還公泣曰心安則身安生死不係於此外艱  
亦如之前後六年不一跡廬外嘗有鼠雉之感而公  
不自有至甲寅 上下旨求孝子觀察使將以公應  
命公上書懇辭曰飛雉之自落羣鼠之自斃此偶然  
耳金先生寄詩曰閔子人無間曰况今誠孝達吾  
君政實錄也其遺戒曰可愛者同氣張公藝九世同

居其要只在百忍字又曰士生斯世經術爲本經術  
旣明則可以治已治人若夫詞章末也吾平生服膺  
在子張書紳之目汝曹勉之壬戌十二月卒距其生  
壬申壽五十一墓在羅州草谷之原配李氏祔公系  
出耽津始祖諱思詮高麗同平章事生諱烈中郎將  
世有簪纓入我朝有諱孝老隱德不仕口不道朝鮮  
字諱閏元進士諱鎮亦進士訓導諱淑拜寢郎不就  
卽公之四世而迪順副尉鄭承孫其外祖也李氏副  
提學元徽之女男女各三男長三省進士次四勿文  
科兵馬評事次五紀女適縣監崔希悅士人金元慶

柳恒四勿之孫元立節度使內外雲仍多不能盡記  
而惜乎其衰替不振文獻無傳卒無得以盡公之蘊  
也然古語云不見其山願見其木觀於鰲山名人錄  
足矣今其諸孫方樹碣于阡上請余爲銘銘曰  
維湖之陽有鬱鰲山八賢齊名公在其間生而庠選  
沒而社祭 地以瀛館何異已第繫公良貴孝爲之  
先物有相感夫豈偶然閔子無間河老有評欲闡潛  
德請觀斯銘

學生金公墓碣銘

采王父陶菴文正先生晚寓龍仁之鄉與四方遊學

之士講道于寒泉之泉食菴學舍常不能容其居同鄉有志有才者殆亦家簞笈而戶絃誦蔚然有彬彬之盛而先生將就醫故里贈金公樂道詩獨曰居鄉十九載幸得一士歸噫其賢已可知而况又有季方之難爲弟者公其人也諱樂聖字叔睿性端方雅淳幼與羣兒戲忽莫知所如家人求而視之乃兀然坐篆隸圖章之間耽玩自若及長於一切世味泊如也不理產業不接麩粳所自娛者經史而已與伯氏居同室遊同門學同業壘篋湛樂講誦不輟知有不至必求審問行有不逮必期實踐多質少文觀其外恂

恂若無能而日必正席危坐固窮忍飢閭然自修傳所稱古之人古之人嚶嚶然自樂者非公之謂歟其先出敬順王至本朝開國有諱稭以勲封鷄林君累傳至元立抗義昏朝後以文科進官府使生諱敏敷正郎生諱載彬生諱挺豪俱 贈參判考以上三世同知中樞諱礪海平尹氏道明女寔生公公娶驪興閔翼聖之女曰星五曰星德其子也各有子女生卒皆丁酉二月其七夫日也墓在本縣器谷坐艮之原孺人耐焉嗚呼公孝友得於天賦其事生也左右養洞屬罔違必務愉婉之色事亡也亦必誠必慎一遵

善身集 卷十三  
於禮兄死於癘闔家俱病公撫柩哀臨間復親自扶  
護如古之庾袞其少時公車爲親屈也而其志則不  
屑故早謝舉業專務爲己晚而析產也做薛包故事  
取其荒頓曰使子孫勤力不患損志戒子姪常曰籬  
金不如一經雖疏糲不繼而處之夷然是皆資性之  
美志行之篤而學問之力有不可誣此其所以一鄉  
稱二難也其從子星漢亦吾鄉飭身讀書之士一日  
袖狀而來曰吾季父墓非子而誰銘者吾老且死恐  
無以藉手歸拜也余悲其言畧敘之如此銘曰  
泌彼葛川曰有一士叔兮志同真實爲己聯床講討

樂有賢兄如壘如簏日邁月征噫其志行孰闡幽潛  
竊附同傳我銘不慙

處士旺林李公墓碣銘

處士諱行祥字公履李氏自中郎將茂始見於譜新  
羅時封延安伯子孫仍籍焉歷幾世有諱石亨德望  
經術爲我朝名臣世號構軒其後代有簪組六傳而  
至諱時尹童蒙教官 贈吏曹參議寔公高祖也曾  
祖諱益基翊衛 贈吏曹參判祖諱莘老 齊陵參  
奉壽秩襲封安昌君考諱喆佐通德郎雅好善秉志  
不苟通德公三娶平山申氏延日鄭氏昌原黃氏公

黃氏出以 英宗乙巳正月初三日生自幼天分近道不妄言笑同遊有語侵父母者不復與也嘗往拜族祖三登公入內必揚聲上堂家奴爲倡優戲者路進珍果公正色不受爲三登公所歎賞十三父命請業于知菴李公維時知菴之從兄陶菴先生講道寒泉之丙舍教育英才不倦四方學者多出其門公進見容止遲重先生大異之遂命來學諄諄於科學之分而常誘掖激勵節次推挽公自是專意間學有進進不已之勢先生遂爲手書以勗之曰萬事一直曰甘白之質可以有爲曰莫負我仍又曰爾若止於一

鄉之善士是負我公時年纔十五六矣公外若質魯內蘊聰穎左右服勞誠心不貳先生視之如手足公亦不敢暫離也先生晚年患風痺口不能語凡有著述酬酢指畫以示之惟公善喻其意雖深夜睡思之中從衣背上亂草畫過而公則曰唯唯及其繕寫無所錯誤先生詩以示意曰樂共訓語古雖有千載實踐惟見爾啞夫暗中書小字微君莫能通其意天爲陶翁生此子又曰吾居此鄉十九年惟質直可望者李處士公履其人也命賜三經四書引重愈盛未幾喪先生如孝子之哭其親痛念恩義求道益切遂與



玄巖宋公熅梨溪成公德朋爲道義契交相切磨師門後事與共周旋乃就舊堂之南建書社妥先生真月朔焚香春秋設講用寓江漢之思湖儒以先生追配雷巖祠公與二公屢書爭之盖不但以冒禁爲先生累也甲辰 正宗冊儲嗣旁求經行之士卿宰道臣多以公應薦拜 光陵寢郎不仕其後朝廷累欲引進而不果甲寅陞通政僉樞以壽資也七十六歲庚申十二月十九日卒翌年三月葬于牛鳴洞先塋乙亥稍上十許武改封丁坐夫人光山金氏祔通德郎泰升女德懿孝順又處事周通男延龜有文行不

問可知爲法家子弟也孫男曰愚明愿明惠明應明惠明出爲三登公後改名學愚二女水使白海鎮成鳳默孫女安秉儼妻也白繼子能洙今宣傳官女先達李應謙成二子載萬載九女鄭淑愚明二男永穆用晦四女長適鄭匡翼餘幼愿明學愚各二男一女應明一男一女并幼嗚呼公器宇敦重資性方嚴望之儼然有不可犯之色而至其事親則務主怡愉洞屬如不及庶母性苛刻所值多至難而公善遇之卒底感服黃夫人寢疾血指灌口及憂服冬不煖夏不箠毀瘠幾不保父喪亦如之去墓十里而遙日以趨

省手自掃除凍風暑雨亦無曠也友伯氏篤疾病親加調護出入躬自扶持及其沒宗孫幼做石潭遺法率宗婦奉家廟同居置祭田以贍宗祀立別廟以奉祧主又嚴於理家閨門之內肅如也僮使不敢褻語於前見人有過作於愚迷則亦不爲刻覈之論若其有挾而任巧詐者必峻斥而無所貸平居夙興整衣冠危坐麤糲不繼而處之迥然探蹟經傳至會心處每再三緩誦尤用力於小學論語而曰讀一章便有一章之效至於天人性命氣質偏全之論自妙歲已悟大意盖亦有所受焉病世之學者不事下學而鶩

高遠不察身心而工辭令遂乃隱居卷道以真實无妄爲自修之要惕然有任重道遠之憂俛焉加戰兢臨履之工四時會村秀子弟設社講以身先之雖大耋不廢程課恒若汲汲焉見其進而不見其退也程子所謂參也竟以魯得之者公庶幾似之噫斯其爲不負先生者歟惟其窮而不憫故志潔而守約質而无華故實過而名遜行義不出於身家教迪只及於鄉隣而卒不得行所學於當世則殆亦命也夫雖然公嘗言近世儒者退讓爲美坐致崇班朝廷之待儒者已不誠而儒者又務爲贊揚君德無一事匡救之

實寧不寒心然則使公而在旌招之列必不爲枉道而徇人矣蓋其操履敦確有威武不能奪者鬼山李公師炳云吾於畏友立節死義當屈一指於公履亦可謂得公之所存也竊又以爲世衰俗渝士之知生三死一之義者蓋鮮矣而公十年在先生側於其容色言動默契心悅敏於承奉能人之所不能而山頹之後語及先師輒泫然血泣隨事與衛終始不懈苟不固誠愛篤信者能如是乎故君子曰陶翁之門得李處士公履而師道復尊信哉先生采王考也采生晚不及見先生之世而每從公獲聞緒餘尙如親炙

故知公者又莫如余詳采雖耄矣苟不言孰徵焉迺爲之銘銘曰

在昔泉門英才如雲公時童卯已自出羣敬受心畫勗以莫負何以服勤如舌如手咸曰異哉天爲陶翁魯而不愚學與性通紹述遺風儀于一鄉養深積厚闡然日章何憂何懼窮斯知命惟孝與友是亦爲政允矣處士實光淵源誰其銘之先生之孫

典籤鄭公墓碣後記

我祖文正公蓋嘗銘公之墓而以公丁丑棄官謂不忝先烈凜乎有蹈海之風銘成後幾年公之六世孫

星采造余而曰嚮吾先人南爲得故師傅鄭公克後贈公詩序以來此逸史也願以是追補以卒先先生未卒之惠也余取而讀之首叙圃隱雪谷二先生忠孝一脉而仍言公嘗直書 大妃排抑凶疏存大義於廢倫之際噫年代旣邈文獻無徵雖不知事實如何然鄭公公同人以文學名學者號曰雙峯則其言必非阿好者也夫恥不肯燔瓦浩然如脫屣是固不愧於先烈而方廢 母之議也設刀鋸鼎鑊以待其貳者舉一國莫不惴惴乃公不懼不屈能辦此樹立是在公少年時事豈不尤卓卓難及矣乎益知忠孝

一脉真有所自來而丁丑事亦權輿於此又不可使無傳也星采纘憲之曾孫其先人名順濟禮所稱不明不仁者可以知愧也

墓表

高麗知密直司事陶隱李先生墓表

高麗知密直司事藝文館提學陶隱李先生沒旣三百有餘年其後孫進說顯德屬采以表墓之文顧世代已邈家乘無徵謹撮麗史所載先輩所述乃敢爲之表公諱崇仁字子安天姿英銳文辭典雅往往絕類唐人牧隱李文靖公亟稱之曰中國罕比賜同進

華身集 卷十三  
士豫章周公倬文華殿太學士吳興張公溥禮部侍郎嘉興高公巽志皆序跋而贊美之然在公特一小技耳當麗運之季與牧隱圃隱諸公爲義理交同其榮辱泊圃隱殉國以公及金公震陽徐公甄等爲黨與悉放流之入我朝不就徵以歿節義凜凜直與秋色爭高其有功於人倫世教何如也始祖諱純由位新羅宰相不肯仕松都坐廢爲京山府吏公實不愧爲是祖之孫歷隴西公有諱百年文密直有諱麟起府尹有諱元具星山尹卽公會祖祖若考判少府寺事金敬德其外祖也恭愍壬寅公以明經登上甲丁

未牧隱爲大司成擇經術士公與圃隱及金公九容朴公尙衷兼教官於是學者全集相與觀感乙卯以典理摠郎上書都堂請勿迎北使丙寅與圃隱議定百官冠服用華制戊辰與牧隱充賀正使如京師己巳以藝文提學爲吳思忠所劾流京山府辛未召還壬申知密直司事是年高麗亡公已廢爲庶人屏居于野及卒我 太宗大王以公嘗典成均試悼念甘盤之舊追加封爵家狀中官吏判謚文忠豈其時所贈歟夫人南陽洪氏判閣師普女子女孫曾多不能記夫人別葬恩津章華山公墓在豆衣谷坊龍宜洞

壬坐原舊有表歲久剝落進說等與諸子孫謀改豎他石云

元翰林學士高麗昌原伯孔公墓表

孔氏自夫子居曲阜地相去萬里世相後數千餘載今有以夫子之後而東來我國別爲東方諸孔氏始祖使我冠章甫衣縫掖之徒得與其子孫遊豈不奇且幸哉公諱紹字無傳當元順帝時魯國大長公主下嫁於高麗恭愍王公以翰林學士陪衛而來錫封昌原伯生居死葬皆於是前配皇甫氏後配盧氏亦於是墓焉公之後遂爲昌原人公初諱昭避光宗諱

改今名云有諱文遠宋朝襲封衍聖公有諱之厚輕車都尉有諱浣仕元爲太常禮儀是公之三世而參以夫子通紀闕里誌自夫子至公蓋五十四世嗚呼公在元爲翰林學士在麗爲昌原伯則官非不榮顯矣其前後令名懿蹟必有以耀人耳目者而一無徵焉生卒亦不傳是可惜已然自生民以來未有盛於夫子則以夫子爲祖者足爲鳳凰之一羽况其子孫有曰俯官至寶文閣提學號漁村與圃牧諸賢相友善入本朝屢徵不起七傳而又有曰瑞麟從寒暄金先生學官至大司憲諡文獻號休巖卽世所稱己卯

名賢賢如二公而成以公爲祖則靈芝醴泉豈無所  
自而來哉雖不備書其言行而公之賢可知余故歷  
敘二公之賢而系之於夫子使世之人因其世德而  
知公之爲公也仍念中原故國東土遐陬耳公之捨  
彼而樂此者何也豈以箕子舊邦素稱禮義之俗而  
函夏腥穢常有帝秦之恥故欲覩衣冠文物之懿因  
事東來故留不返歟朝野史乘雖不概見而後千百  
世或有公眼者出庶幾有以論公之世而知公之心  
也噫公之雲孫多在嶺表不能盡記而參奉 贈參  
判德一侷儻慷慨當南漢下城之後屏居駒城以酒

隱自號亦不愧爲二公之孫參判之後處仁謂余居  
同鄉以其諸宗之議謁余以樹阡之文曰去先祖四  
百有餘年幾不識昌原伯之墓今黃山丞胤恒磨礱  
一小碑以待子一言之重余辭謝曰我 正宗大王  
特命錄公後官胤道胤東又自今命貫曲阜以明其  
出自中國異數也可使公不朽蓋以是歸而刻之

有心齋李公墓表銘

當宁五年辛丑有心齋先生李公以疾終于永平之  
玉屏舊第距其生甲午六十八遠近學者爲位而哭  
旣葬徵士閔公彞顯左議政金公鍾秀爲之誌其壙

而銘其碣曰泉門高弟吾學正脉噫斯可以知公矣  
公諱和甫字太醇始諱醇甫字太和寔采王父陶菴  
文正先生所命其改之避 肅廟嫌諱而非公志也  
故以字易名以不沒命名之遺意焉始祖讓寧大君  
屬盡世襲簪纓至諱澤參奉是思庵朴文忠自出李  
氏家玉屏自此始祖諱弼文考諱壑有行誼妣鷄林  
鄭氏資憲國良女公資性厚重器度峻正幼而不妄  
啼不妄言笑稍長讀孟子至有爲者亦若是喜曰聖  
人可學而至未冠請業于文正先生知有古人爲己  
之學事親持身一以小學爲準每歸覲率弟妹拜堂

下如柳仲塗家法常曰士當志伊尹之所志學顏淵  
之所學及知世道之終不可爲遂慨然不復跡城市  
時年十九卓然以斯學自任以誠實爲造道之本以  
涵養爲應事之基讀書必字究句索體之於身文正  
許以畏友又嘗曰太和有儒者本色間移寓湖西與  
多士相講磨屢行飲射禮鄉里蔚然有興起之望及  
文正棄後學益無意於當世與朋友別立條約直以  
斃而後已爲心常戒舍近而趨遠處下而窺高凡有  
學者必先之以小學曰人道盡在是矣晚而復返于  
玉屏喜讀易十數年不輟再登薦剡除 敬陵 慶



墓殿參奉皆不就然其言曰孟子之於滕文武侯之於昭烈尤翁之於孝廟真千載一值想像其際依然身親見之人或疑公以果忘者非知公者也疾革戒諸子曰毋廢小學扶坐誦西銘不少錯至存順沒寧三復太息已而翛然而逝嗚呼賢哉公以親喪殯歛未悛爲終身痛常戴蔽陽子服素練深衣惟篤志力行六十年如一日遯跡自晦沒齒無憫若公者豈傳所謂病無能焉不病人之不已知者耶墓在文忠墓右枕丁之原亦玉屏也有遺集數卷方謀劄劄云配平山申氏進士大一女舟村諱舅其曾祖也事舅

姑以孝奉君子以禮有女士稱與公生同年先一歲卒至是祔有二男一女男長堯欽克紹家學次允欽女直長鄭在心堯欽一子永元允欽二子永仁永智鄭繼子九鉉堯欽以樹阡之文屬之采采以文正之孫雖不肖何敢辭銘曰

志伊學顏不遇者天存順沒寧是謂之賢

### 太古文公墓表

公諱希舜字汝華嘗隨計入都拂袖歸卜天皇之臺築太古之亭居之琴一簫一壺一竿一舟一雜植蘭蕙花木日相羊其中以終其世風致蕭灑人比之懷

葛之氓先是丙子之難公糾義旅從安牛山那俊進至礪山聞南漢媾和遂忼憤不自勝有詩曰如何崇德元年號忘却 神宗皇帝恩又嘗自書曰魯連一去海月蒼茫陶潛已死菊露凋零其雅志可知也文氏出南平其最顯者曰江城君益漸左司議諡忠宣功著國乘江城以上有諱克謙太子太保諡忠肅以直道聞鼻祖諱多省厥初有異蹟同平章事諡武成入本朝代有簪纓曰獻曰彥光兩世參奉於公爲高曾祖祖瑞霖內禁衛將考載道節度使妣僉正林汝雱之女公自幼少文藝夙就早從牛山遊得聞性理

蘊奧事親之誠不以年老或懈憂國之心不以疎逖自外敦親戚賙窮急傾其產而不恤也常以孝悌戒子孫曰以此遺若不猶愈於產業乎老峯閔公鼎重高其行欲出而仕不能得戊午九月廿三日卒去其生丁酉八十二其爲護軍壽職也配趙氏鳴國女也墓在中彌刀良坐原同塋異墳世徵世章世黼世泰鄭文周梁禹軾南礫其子女也命河範河緯河受河重河錫河炳河敘河始河啓河達河其諸孫也謁余文者桂恒始河曾孫云金寢郎允秋余所敬也題公遺事以爲公忠孝文學爲士友重其蹈海之風尤後

世所當傳余故表其墓曰太古文公噫斯可以見公也夫

縣監趙公墓表

趙公宗喆字曾一其始葬公山也余往而哭而祭之後幾年移窆于洪州白月山舟谷坐乾之原其胤子郡守君屬余以表阡公自余家出余又公季父參判公館甥故兩家如瓜葛公友余余則兄公識公深者莫余若是宜有是托公少卓犖不羈儀觀豐碩氣宇魁健望之有不可犯之色及進而言欵洽也喜賓主讌樂風流每籠蓋一座而見其有不當意者不憚面

折做事不拘小節一有所執若不可奪至其理到之言幡然聽納平生不妄施予凡人死生急難不愧古義士風處兄弟分劑酸醎遇家衆嚴在官吏不敢仰視一切不修邊幅視世之粉飾者若將浼焉故有善未嘗自衒有不善亦未嘗自揜其高見達論往往有人不及處而顧未嘗以文識自居也公乙酉進士歷官義禁府都事童蒙教官 徽寧殿參奉 宣陵直長瓦署別提司憲府監察出爲宜寧縣監未朞而遞及歸參判公被追禍冬丁副正公憂震剝憂憾以終其世公之世出揚州代有簪纓右議政忠翼公諱泰

采是所稱辛壬四大臣貞忠大節昭載國乘其嗣子  
諱鼎彬敦寧都正季諱謙彬教官 贈吏參是生繕  
工副正諱榮克出爲伯父後是公三世妣牛峯李氏  
右議政諱翮觀察使諱晚堅其曾祖若祖公之配安  
東金氏清陰文谷之後承旨文行女也四子鎮翼卽  
郡守鎮靖鎮敏鎮剛進士敏與剛出后四女洪羲敬  
郡守申在明參判金魯誦金在宣諸孫斗淳台淳皆  
進士奎淳箕淳教淳致淳外孫進士申錫輔直長錫  
弼進士錫昌未冠者不記公以丁巳生丙辰十二月  
二十一日以卒金氏貞惠有婦德後公十七年壬申

八月一日卒而耐嗚呼公生忠賢之家遭 聖明之  
世宜若順鴻毛展驥足而顧其所遭者反是官不過  
一縣流離湖海且數十年豈非命哉余嘗與仁卿訪  
公龍湖亭榭盛衰存沒之際涕笑淋漓進退榮辱之  
間論辨崢嶸達曙不寐余喜其少時志氣尙在也不  
數年公沒仁卿又死獨仁卿之弟貞喆成卿自海島  
不死而歸今爲下大夫公之子若姪亦由蔭路進而  
公皆不及見悲夫參判公於人少許可而其言嘗曰  
吾諸姪中白睂最良有大家風範又按仁卿所爲誌  
其論分門割族事有曰柄國者怵以危禍啗以勢利

公屹然不動如砥柱捍衝波噫無容改評矣參判公諱榮順仁卿名元喆其父子文學言議非阿私者是爲表

縣監 贈參議鄭公墓表

英宗四年戊申春嶺南賊希亮等大舉兵謀犯京師旁近縣故家巨族靡有不染者獨一蠹鄭文獻先生嗣孫胤獻罷官在鄉以忠義激勵宗黨與七人者瀝血爲誓先以討賊方畧聞于官旣又移檄於衆曰爲人臣捐軀報國此其時也遂聚家僮若干將以身赴之已而賊燬之計遂已御史朴文秀聞之曰咸陽鄭

氏一門能獨保臣節及按察本道馳啓于朝請以褒典大臣宰臣亦屢言之然始公推尊屬爲首故則不與焉 當宁已已繡衣自南還又稱其屈以申前請上可之特贈吏曹參議爲一路忠義之勸噫公議於是乎無憾矣朝家獎褒之典亦至矣公字君述貫河東高麗樞密副使宥爲始祖入我朝先生以上兩世以孝以忠著自先生而五世曰光漢司馬曰世杓曰熙章以門蔭進官縣監察訪察訪配晉陽河氏生公于郡東羅村年五十二癸亥正月廿八日以卒從葬于先生墓下歷官 明陵參奉繕工副奉事尙瑞直

長瓦署別提禁府都事遞復爲通禮院引儀濟用判  
官延豐縣監淑人清州韓氏洪憲女配君子無違生  
一男四女鎮華奉事宋梅相李鵬海曹洞趙河彥其  
婿孫德濟縣監曾孫東老東民進士東著東亨東翊  
外出不記嗚呼公性謙恭謹厚處鄉黨恂恂也至其  
義理之辨是非之爭則截然也是以臨亂奮義獨不  
爲凶逆誑誤超然自拔於遠近風靡之日而不墜忠  
貞之家聲君子矧之余故畧其細行而表見其大節  
以遺子孫以揭于阡隧使後之人知公之爲先生之  
孫

參議著菴俞公墓表

近故刑曹參議著菴俞公少喜爲文章從太學士雷  
淵南公學上之非秦漢下之非韓歐不爲也晚又取  
聖賢書讀而樂之於庸學最流利案上常置朱子朱  
子大全蓋將欲就而忘身之老也年八十辛未七月  
二十八日卒君子曰噫文章其衰矣始余猥托忘年  
與公善一日馳書使余記其所謂便此菴者曰菴在  
桂陽府下梧之亭卽其傍吾將死便埋此至是所後  
子晦柱遵遺志以十月干支背良而封封而虞泣且  
言曰先人疾革有遺托不啻申復願執事之圖之余

華泉集 卷十三  
日諾既諾於先大夫其忍負諸雖然公嘗自誌李洗  
馬度中又有銘何用余言爲無已則余嘗以十二絕  
輓公勑其一曰生老昇平八十春本之經術措諸身  
駢花儷葉都刊落當世文章第一人雖其言簡其詞  
蕪庶幾盡公之名行是可以表于阡也公杞溪大姓  
在羅麗尙矣不須譜我朝 中 明間有景安公諱  
汝霖肅敏公諱絳仍父子爲正卿歷兩世有諱省曾  
諱梲亦父子觀察使生諱命賚遊宋子門官監役不  
就 贈吏判生諱廣基蔭仕知中樞府事生諱彥鑑  
宣陵直長公之考也妣昌寧成氏必升女也子晚柱

出後伯父有文行早坳其二子久煥未冠敦煥纔勝  
冠亦天二女趙涉金道喜文科注書晦柱五男長元  
煥餘幼其宦蹟戊寅小成由參奉奉事都事主簿佐  
郎正郎僉正副正庶尹司禦間辟爲太僕惠局郎如  
軍資掌樂正 元子僚屬皆選也通政壽秩而參佐  
特恩也外則軍威金浦益山海州富平三陟清州往  
往有去思沁都經歷暫赴旋遞其文曰自著佚宕適  
勁馳騁恣睢棣棣乎不可選而公五十年肝血在此  
可傳於後無疑也人爲有自著遂名其菴而號之公  
則謙不自有也嗚呼公嘗與洛中五老做睢陽之會

時諸公年皆七十餘余未六十而公引歐陽司馬故事要余跋其帖余固屢辭而其相與之隆如此余於公之美豈不欲悉書所欲書而公嘗言人銘誌寧簡而不溢爲猶可信余故只論其文章而其他不論也然每見公平居淨掃室堂時羣書冠程子冠帶韋帶方面炯眸巖然危坐彷彿有道者氣貌後有子雲堯夫者出必不以文章蔽公也噫今不可復覲矣使九原可作曼倩將謂何如曼倩公字也諱漢雋初諱與字曰漢炅汝成夫人順興安氏縣監取範之女云

孝子朴公墓表

毀而死記之所謂傷孝也而後世許以出常五十而慕舜之所爲大孝也而末俗視同庸常是曷故焉古之君子好常而不好不常自世級降而一切反是常常少而不常常多如水鯉慕雀之感烏頭赤角之旌所以殆相續也今有生不識父母顏幼而慕長而慕卹卹有終身之慕者宜若有稱焉而世皆以爲無驚異奇特底事獨泯泯也此有識所竊歎余於近世得一人焉密陽朴公諱霽字雲瑞是已髮未燥父母死於癘稍長隣兒譏其皆有而獨無遂失聲大慟常戚戚若窮人無歸一日惕然曰孤而不學何以爲人乃



往隣塾願受小學書讀至事親養親等事輒廢書而泣人目之以天生孝童及冠自處如草土人衣服必取純素冬以僦綿夏以大布常曰我是天地間罪人亦何樂見人具慶讌樂亦涕雖有動人歡喜事家人未嘗一見其啓齒每親諱號隕叩叫如祖括初享需以蠲潔爲務以誠敬爲主曰不悖於文公家禮粟翁要訣庶無忝情隱先祖情隱者其曾祖也諱杰隱居篤修有士望 贈戶曹參議祖諱敬睿 贈兵曹參判父諱致龍其先出自密城君諱彥忱至本朝簪組相承中世稍不振云公以讎日感疾遂不起於十

二月廿三日實公年二十七丁丑也葬楊州真巖辛坐原配劉氏附其左公卒時有三歲一孤胤既長名曰哉亦以孝稱嗚呼是真可以不忝於情隱也哉之孫鈗間流寓壽春嘗以隧銘謁余于橋上觀其狀蓋眞實無華其言必可信文未及完余適就養是府一境章甫有以公父子事行籲于官者兒子以示余余於是益信其不誣而事亦有不偶然者遂爲之表如此又方規所以闡聞不幸值國故卒未果是亦顯晦有時歟雖然好是懿德人之秉彝也後必有遂之者第埃之余以衰世之意懼或終泯首論其常與不常

而歎古今之異也

贈弘文館修撰辛公墓表

文科 贈弘文館修撰辛君德羽字景輝吾同鄉少友也其爲人冲素敦慤無疾言遽色嘗任三院事務周便一無崖異乖激之習一鄉皆愛而信之余亦遇難疑必咨於君蓋相得懽如也今君死矣誰與語者噫辛氏出寧越自其始祖太傅門下侍中諱鏡九傳而至諱仲碩亦門下侍中世世累公累卿門戶燁赫諱燾入我朝漢城尹傳九世至後元簪纓不絕諱迥居憂除監役遺誠不書銜是君高祖諱義配諱學三

諱師夏以下三世皆不顯然鄉黨皆稱其才行妣德水李氏溫之女君以丁丑十二月十九日生自學語穎悟夙就讀史畧未半文理已大進及長以親意從事功令大小發解凡十二應製入格亦二十三而其居魁者七聲名藉甚人謂朝暮一第如拾芥先是庚戌 正宗謁 顯隆園還御洛南樓親試士君以築室儒生應舉擢乙科將唱名筵臣以無籍執不行上嗟惜之物論亦稱屈後二十五年乙亥君之子淳訟冤輦路 特命復科時年已五十九噫其畸矣法當陞品而未分隸不果以假銜一入堂后翼年十二

月八日不幸以疾卒于鄉廬其 贈館職例也嗚呼  
是奚足爲景輝身後之榮哉旣訕而伸若將展其蘊  
以補鴈門之跂而竟又闕之惜哉命也君雅好書古  
今文字一寓目輒誦誦久不錯一字嘗以經傳疑義  
往質于中洲李文敬公文敬深許之君平居不自以  
問學名而夷考其持身制行實有過於人者常誦爽  
口物多須作疾快心事過便爲殃之句以誡子姪鄉  
隣有不善者必以義曉之往往至於感悟每歲鄉貢  
輒推君才學三薦于縣非有信義之孚而能得此乎  
有詩文幾編藏于家君居在駒興里其卒也就家後

葬以癸坐前配朴氏文奎女先公歿祔其左繼配鄭  
氏時淵女有三男長卽淳進士二女沈鍾李仁鉉皆  
朴出次浣瀚一女幼鄭出云余老廢筆硯於孝子之  
托不忍辭嗚呼景輝其不朽也耶

華泉集卷之十四目錄

墓誌

判書深隱李文靖隨墓誌銘

雪谷鄭公保墓誌

判書鄭公存中墓誌銘

進士張公瑠墓誌銘

孝子金公景淑墓誌銘

縣監崔公德中墓誌銘

通政大夫李公許傑淑夫人柳氏墓誌銘

副護軍安公滢墓誌銘

寧越郡戶長 贈參判嚴公 興道 墓誌銘

退洞處士權公 克達 墓誌銘

學生李公 德屋 墓誌銘

孝子朴公 載 墓誌銘

是春窩沈公 師章 墓誌銘

進士黃君 基瓚 墓誌銘

華泉集卷之十四

墓誌

判書深隱李文靖墓誌銘

國朝重庭享人材又莫盛 英陵之世時則有若領  
議政翼成黃公喜領中樞府事貞烈崔公潤德左議  
政文景許公稠左議政文僖申公槩以一體同德之  
臣修邦制而煥 王猷前後事功至今赫赫照人耳  
目獨深隱李文靖公以甘盤之舊官吏兵曹判書兼  
藝文館大提學名位如彼其隆顯宜其經術德望文  
章事業有大河觀者而竊惜夫湮而不章鮮有知者

世固寡陋亦由乎其文獻不傳也然非有輔相之尊  
勲戚之親而畢竟與四公者同與穆清之班左右陟  
降則非賢而能之乎是可以知公也公諱隨字隨卿  
鳳山人其後孫得元以其亡父意褻足詣京師規欲  
闡揚先徽走謁諸公卿大夫求所以不朽者仍又屬  
采以幽堂之誌嗚呼墓而有誌禮也其葬也朝廷命  
有司董治焉而公卒且四百年則其間豈無誌者盖  
有之矣而今亡也遂不敢辭著其先世後承官蹟生  
卒及一二事行以塞其請其先世曰有諱鏡蘭中郎  
將寔公始祖生諱道亨道衿生諱尙夏尙華生諱弼

中生諱仁豹生諱錫發并顯官此出於舊譜傳疑而  
未詳其孰爲禰祖也其後承曰持平貴從佐郎筮從  
府使福從參奉吉從其子也適進士崔孟縣監崔安  
智者女也持平佐郎及二女參判豐壤趙成吉外孫  
叔季以判尹平山申夏爲外祖趙氏申氏皆貞夫人  
孫曾以下不盡記請予誌者距公十三代而其亡父  
應說云其官蹟曰 洪武丙子魁生員試自後學益  
就始補 太廟郎轉內資直長敬承府丞通禮門奉  
禮尙瑞院直長尋擢謁聖第四人拜典禮主簿至判  
官遷宗簿寺兵禮二曹正郎典禮少尹直集賢殿藝

文館知製教兼 世子右文學至弼善司宰監正先是 太宗訪求經明行修者成均館以公薦 特召之及至諸大君以師禮禮之 英陵在潛邸受知尤優異焉至是受 內禪特擢公爲同副代言轉右副左副歷戶禮兵刑曹陞同知摠制寶文閣提學同知經筵事集賢殿提學爲便養出爲黃海道觀察使還拜摠制 世子左右副賓客藝文館提學仁順府尹吏曹參判超授都摠制成均館大司成進藝文館大提學議政府參贊吏曹兵曹判書其生卒曰庚戌四月扈 駕詣慕華館醉墜馬病遂欲越三月卒于第

是 宣德五年六月十五日也距其生甲寅享年五十七訃聞 上震悼率百官舉哀臨吊庀喪某月某甲歸葬于鳳山之楚邱坊漁隱午坐原據禮卽 賜謚謚法博學多聞曰文寬樂令終曰靖深隱其號也環所居四十里鳳人稱其坊曰文靖村曰寬惠井曰御授村名井號是必有所以然者而亦未可詳也其事行曰公重厚謙恭文雅純謹不事修飾待人以誠少好學於書皆精究實踐執親之喪遵禮制斥浮屠一洗麗代之陋習至於窮達榮辱常泊如也喜怒不形清簡自持雖燕居必正其衣冠如見大賓居官咸

稱其職常帶賓師之任而爲世所推重遺文散佚有御前咏桃詩一絕其詩曰李白桃紅品自殊一枝三色問何由只緣先後分深淺非是天公別點頭三復詠歎尙有餘趣卽此一瓣足以知全鼎之味也顧何必多乎哉又按公世譜舊跋謂公選清白之吏亦未有可致晦而復顯或有時存歟采不揆僭妄謹稽李公命生所爲公節壹之狀而參以諸家文字撰次如右然以公事蹟無徵故繁而不殺庶幾百世之下太史氏作而得以考實焉則非公之幸卽國家之幸君且歸而俟之系以銘曰

洪惟 英陵我東方聖羣龍在朝於斯爲盛若黃若崔若許若申輔理 王政爲國蓋臣公挺其間布衣賓師 王曰同德日篤倚毗授之銓衡置之文垣曷不欽承以答 殊恩而其德業泯而不顯非敢不信奈無文獻欲知公者盍觀於 廟公與四公齊武并耀鍾鼓嗶嗶陟降庭止左之右之百世饗只君臣之際猗歟明良點檢終始經術文章一言以蔽 聖朝名碩我銘非夸昭眎千億

雪谷鄭公墓誌

往在丙寅之冬采爲鄭府使亮采所屬序其先祖雪



谷公實記公圃隱之孫六臣之友吾王父陶庵文正  
公嘗以是銘其墓又記其表陰曰公少中司馬爲司  
憲府監察及六臣獄起公慷慨不食其庶妹爲韓明  
澮妾一日醉往見之問明澮安在曰在闕鞫囚也公  
發怒罵曰爲我語令公公當爲萬世罪人明澮以聞  
上親鞫之對曰常以成三問朴彭年等爲正人君子  
故實有是言 上怒甚命輟之顧左右曰誰欺遽  
命止之曰忠臣之後不可殺遂流于延日後徙丹城  
以卒事見國史及丹城志噫此可以使公不朽小子  
何敢述况 肅宗己卯復 莊陵旌表六臣諸人公

亦 贈吏曹參議 正宗辛亥又教曰故監察鄭保  
之忠節可謂不死之死六臣况以乃祖之孫踵守家  
聲尤何等卓爾仍 命追配於圃翁之祠祠卽龍仁  
之忠烈書院是已保公之諱也上所稱雪谷其號也  
嗚呼當諸公就市之日 光廟有後世忠臣之教大  
哉王言實有以啓牖我 兩聖朝表忠獎節之典而  
所以善繼善述亦豈不有光於 光廟之聖德至仁  
哉雖其成就不同其歸一也真不愧爲圃隱之孫六  
臣之友也公葬在先生墓右麓與夫人密陽朴氏兵  
馬使登之女下上而異封考曰宗誠吏曹參議妣曰

延昌郡夫人竹山朴氏提學仲容之女三男六女已見載於隧表內外孫曾以下不能盡記采亦公彌甥也雖老耄何敢辭誌幽之托謹以 列聖之褒先祖之銘誦而叙之

判書鄭公墓誌銘

尚書鄭公始由蔭屢歷州郡自以家世簪纓不忍遽謝公車雖浮沉朱墨猶不廢博士家業以 正宗三年己亥魁泮試翌年擢殿試丙科時公年適六十雖其一第晚晚晉塗在通塞間然不以得失介其意有官則進無官則退杜門終南之下却掃靜居非公事

未嘗造謁輪蹄絕罕蕭然若寒士家而尚能按藩臬位宰相入者社九年而卒一未嘗藉人吹噓實 特簡也優老也識者謂榮枯貴賤皆有定命非人力可容觀於公信哉公諱存中中年改以存成因 景慕宮嫌諱還復初名字士靜又曰靜甫系出東萊鼻祖安逸戶長文道一傳而左僕射穆始顯高麗入我朝有諱賜直提學生諱蘭宗左參贊生諱光弼領議政以宏材碩德相我 中宗是所稱文翼公爲世名臣配侑 廟庭再傳而諱惟吉號林塘諱昌衍號水竹兩世皆左議政生諱廣敬吏曹參判 贈領議政生

諱至和重林道察訪 贈吏曹參判生諱載厚綾州  
牧使 贈吏曹判書卽公高祖以上曾祖諱濟先持  
平祖諱亨益判書並 贈左贊成考諱弘祥副修撰  
疏論蕩平伸辨四忠卒于謫所年位俱齊妣林川趙  
氏判書孝貞公正萬之女以公貴 贈吏曹判書貞  
夫人公以 景宗辛丑十一月六日生幼而氣度凝  
重見識弘遠從祖判敦公素清介簡嚴少詡可於公  
甚器重之及長文華贍富功令各體無不便敏尤工  
於駢儷累占大小科發解甲戌司馬乙亥蔭仕內則  
懿陵參奉翊衛司副率陞司饗院主簿刑曹佐郎正

郎司僕寺判官 宗廟署令工曹正郎外則新溪縣  
令丹陽天安郡守海州判官密陽南原府使忠州光  
州牧使丹陽以三銓姻嫌遞忠州以密陽事坐罷皆  
未赴庚子唱名資窮陞通政內則參知兵曹者五參  
議者五參判者一爲承旨者七大司諫者五一爲戶  
禮刑三曹參議漢城府右尹判尹刑曹判書再爲知  
敦寧工曹判書三爲大司憲知中樞兼職則三院副  
提調內局社稷瓦署掌苑提調副摠管都摠管知春  
秋館事同知義禁府知義禁府事而摠管義禁蓋屢  
入焉外則楊州長湍忠清道監司開城府留守開城

則以未卽肅 命罷已酉嘉善記舊也庚戌嘉義資  
憲甲寅正憲皆尊年也其爲邑也律已簡嚴莅事公  
平所至有治聲溪人四十年歲致餽以答遺惠密人  
勒石以思之其按臬也委畀之 教丁寧諄復至謂  
湖西一道庶可以移風公感激 特簡益思淬礪繕  
保障之地以固圉創補民之庫以蠲徭時詣校宮躬  
行講會修葺院宇敦尙正學尤致意於審理考績之  
際及還朝以道內八件事條奏多蒙採施其在喉舌  
也出納必謹嘗以申驥顯請討事有藥院權減視事  
勿稟之 教舉朝遑遑諸承宣求對不得旋又求對

紛然以遞罷爲準的 上意方以爲未安及公入院  
率諸僚請對者再而夜色已闌故方退歸本院擬啓  
未達忽下反汗之 命翌日入侍 上曰予於此承  
宣殆不識何狀以昨夜事見之不撓浮議能守已見  
足令人欽歎公奏曰當國勢岌岌之時如臣異劣終  
不能碎首宸陛感回 天聽臣實愧悚如不欲生當  
夜夜深只求對者再意欲退而陳啓未及書伏承反  
汗之 教臣獨幸免罪恬然在職者真所謂不識世  
間有羞恥者臣旣失職宜不敢猥陳匡格之言而近  
日所下 傳教中蔑分二字終欠敬大臣之意請並

還收以示日月之更焉又曰 殿下雖以大舜封有  
庠爲心而羣臣以周公誅管蔡爲義實無可怒可罪  
之端矣 上嘉其得體而允之公之知遇實自此始  
其在臺閣也嘗以堂錄事因辭疏請改圈其畧曰昨  
日次對之 命下也丹宸靜待赤舄逡巡廟務之講  
未聞卿宰之會且歸伏想乙丙之枕益復靡安於今  
宵矣朝象之如是泮渙實緣堂錄猥雜物情未叶一  
番改圈瞭若參衡且圈中諸人旣多一時之選無容  
更借於異代則豈可任其引義却步徒曠啓沃之重  
任耶又疏陳所懷曰臺臣去就不宜自輕除非國有

大事諸臺之一時齊進致駭瞻聆非臣攸聞也此非  
但自來株守到底難變惟我 殿下今日處分終涉  
過重爲一重臣進身之路許多諸臺口傳招來有乖  
聖明重臺閣之本意也時承旨朴奎淳以尹永僖事  
顯有掩護之語蔡濟恭居相位不惟不攻乃反營救  
公又論之曰 殿下以敬大臣三字鉗制羣下使莫  
敢誰何於揆地袞職有關臣下不匡尙有罪焉况大  
臣舉措不叶人心者非止一二則位在卿相而初不  
敢論列者豈可成說乎昨日大臣力戰公議營護私  
親臣見人疏本始知梗槩而雖以近日塗人耳目者

言之李趾永之連三望備擬於檢詳者難掩其阿好之跡矣趾永嚇喝玉署之長胡亂冒圈使館錄人人引義豹直久曠 中批苟充莫非此人之所作俑則大臣奚取於斯而急於吹噓有若趙普之補牘三上耶詩曰人之多言亦可畏也其發言處事全欠敬懼如此而其可免無忌憚之目乎向來朴奎淳之咆哮院座何等變恠而 殿下不賜嚴處使堤防不嚴事端層生朝象日益不靖國綱日益不振此臣所以撫心悼歎傾倒至此惟 聖明廓揮乾斷亟竄奎淳以懲黨惡之習焉疏入 上教截嚴以爲近日攻大臣

者語多情外固已嚴勸痛禁而至於某疏雖與情外之說相反所以攻者無他說卽李趾永連三望備擬一事而已旋又引趙普補牘三上說以證之譽云乎則何以無忌憚攻云乎則攻之者何事卽令王府拿鞫及再供仍 命龜城府定配又因臺啓更令卽其地安置其翌年春以歲改年老 特命放還田里尋叙 特教付軍銜因者社褒賤有入侍之 命 上指公曰昨年事予非深疑但過聽矣卿勿介懷也公對曰今日以後雖退填邱壑可以瞑目矣盖 上始察公無他斷斷注意方隆諸司提舉之一時兼帶皆

在是後公之子文綏纔以 特教甄復爲參奉至是  
申命與京職相換俾便救護又 特賜蓼料皆異數  
也此其科宦本末出處始終而在家則享先之節務  
盡誠敬雖祁寒盛暑必親裸將務潔籩豆輒思其所  
嗜而薦之四時正祭乃門中所未有而公深惟禮意  
具祝而創行之以前喪未及終孝爲至痛其侍趙夫  
人疾沐浴禱于廟能得孝感及喪含斂葬祭俱盡情  
文有一妹篤友拊其所生殆類已出常以俸餘濟其  
乏教子孫必以義方而不响响於慈愛書揭延平居  
室不作費心事九字篆刻磨不磷涅不緇六字蓋惡

時輩詭隨深巧者而自勵也服御飲食不事華侈常  
曰於分足矣自莅郡按藩不思裕後之圖至其待人  
則虛襟應接不設畦畛處宗黨和而不狎御僮僕嚴  
而有恩見人患難喪憾必盡匍匐之義雖賤流薄有  
才華則必欲訓迪而成就之此存諸身而著於行者  
也以戊午三月二日感微疾終於長興坊舊第以五  
月十一日葬于天安馬駕山艮坐之原卽公所自占  
而以元配坡平尹氏窆焉至是穿其左而合封尹氏  
大提學圃巖諱鳳朝之孫府使心宰女其才識卓絕  
言議清灑奇心遠想迥出埃壘嘗與公有荆布提甕

之約先公五十七年壬戌卒圃巖公爲文而哭之稱  
道甚盛延安金氏縣令相后女御榻有法奉先無缺  
別葬果川之蹲巖兩夫人皆從 贈如例二男元綏  
尹氏出有文行早天文綏縣監金氏出側出寬綏長  
房二男一女世祐進士世禎洪樂宣監役二房一男  
某世祐有一子一女皆幼嗚呼采早孤失業三年從  
公學與公二胤遊至今老白首粗能知魚魯之辨者  
寔公所賜窈矚公容儀白晢豐潤舉止願偉坦疎望  
之可知爲重厚長者平生不作皺眉事見時政得失  
獨憂惋歎咤佳辰觴咏以暢幽懷閒居手談以消愴

寂對人絕伎求之言臨事無躁暴之色用舍行藏一  
任儻來榮辱禍福都付定分謂人若已濶於世情居  
今志古信心直行是故不免西塞之一謫而是豈公  
所料哉方濟恭事出卿宰臺諫無不交章請討而類  
皆謄傳如印一板公深惡其不誠不欲隨衆劾勦其  
治疏也畧說陳談又拈出檢詳事添其一罪其間一  
句語於倉卒應變之際固或引喻失當而古人使字  
多斷章取義盖斥之也特不能峻耳曷嘗近似於附  
麗之目 天鑑孔昭環召遄降及侍前席慰諭鄭重  
至 教以宦路蹉跎朝廷當受其責於是乎公之心



事見白而自是數年以來低擬受點添書 特除未嘗有一日無官時其受知於 聖明如此則彼世之好議論長短者顧何累於公哉世祐世禎采之甥也與縣監君共爲狀一通嘗屬幽宮之銘諾而未就今二甥與縣監不幸後先死一何酷哉重爲公於悒也  
銘曰

文翼之後蔚有名碩公生其門圭組有赫重厚寬簡其容也頎惜屈朱墨白首栖遲出一口氣于後生羣所不諧俗是以迍邐誰之不如而不華要西塞風雪匪怒伊教豈若時人工於龍斷孔昭者天前席夜半

王有恩言曰余過聽公拜稽首死且目瞑明時知遇聖朝耆英馬駕之原請徵斯銘

進士張公墓誌銘

采先祖忠憲公按嶺節旣又知仁同府南方士友自是多從遊者張氏於仁爲望族有諱瑠字留玉年方少已能酬唱官梅出而遊尤菴宋文正之門與權文純諸公相講磨器宇宏偉文詞瞻蔚士林間文字多出其手文純許以波濤之筆然晚中司馬廢舉不第及忠憲兩世秉銓屢注擬寢郎終亦不得雖其不得者命耳而見重於先輩長者者如此以 英廟甲辰

三月二日卒去其生已丑七十六葬某村某向之原配全州柳氏耐公天性孝親癯嘗糞及喪廬墓致毀嫉惡崇德不憚身先爲栗谷牛溪尤菴三先生辨誣者再請沙溪金文元公從祀聖廟者五疏皆自製而義理條暢老而喜學尤用工於禮書其所著有四禮集說四禮策題議禮集說喪禮要覽藏于家又嘗自號安齋記其齋曰口不厭糟糠身將老寂寞若是者皆吾命也吾自安之吾故名吾齋觀于此公之所存可知已上祖諱金用神虎衛上將軍諱安世德寧府尹我 太祖有潛邸之舊屢徵不起其子仲陽左尹

孫脩遺逸掌令歷數世諱潛進士號竹亭是生諱崑參議寔公高祖曾祖諱龍翰號岐村竹亭岐村學靜菴栗谷之門以鄉先生祭社云祖諱乃亮考諱喜達隱德不仕妣延安李氏校尉錫祚女延安君淑琦之後男大顯女郭始振大顯二男長緯天僉知中樞次紀天二女適康聖錫宋相輔緯天繼子兌赫二女朴重光宋淹曰兌益兌恒其庶出紀天三男兌赫卽後伯父者兌燭兌煜思欽康婿出希元宋婿出朴重光男思文思烈宋淹男國明日鶴籌曰鴻籌曰龜籌兌赫兌燭兌煜出餘並幼采偶官于南距仁密邇一日

僉樞使兌燭以書幣來並付遺集若家狀請以弁卷之文誌幽之銘曰使吾祖不朽是在君一言况先生陶菴文正公諾而未就者願君之終惠之也采固不敢當而亦何敢辭遂爲之銘銘曰  
筆下波濤遂翁所推有才無命其將尤誰吾名吾齋曰吾安之以公銘公尙徵在茲

孝子金公墓誌銘

歲辛亥之春金生楚和來自一善訪余于龜城之平遠堂敘舊好仍歷數隣近士有舊好者而曰吾鄉有金公景淑出入先文正先生門下有年今也則亡子

知否乎曰後生未之聞也問其人何如曰金公性至孝父病有魚雉之感殆無愧乎古之王祥士林以其實行屢聞于營邑尙未有旌褒人到于今惜之余曰孝子哉孝子哉雙鯉躍出黃雀飛入自王祥以來已有此理然爲其古今罕有故人未之信今未有以旌褒者其以是夫有是孝則有是感無古今之殊而其所感者罕特孝有淺深焉耳以其罕有而爲不足信則非有道之言也仍叩其所未聞而恨無以得其詳也後十數日公之子允恒袖其世譜遺事過余而泣曰吾父沒二十年矣泯泯焉無傳則罪在不肖百世

之下誰知者吾父生而有深愛得一味必獻父母父病須用鰕可已時值天寒吾父方九歲伐冰求之得魚而歸果立效及長父又沉疾食飲全却藥餌無驗思欲山梁患非時無以市吾父達宵號泣忽有雉雉不驚不飛遂就而捕之以供焉當戊申之亂吾王父以別義兵都摠將從征吾父請隨後王父叱之退曰童子何知吾父泣曰我始祖順忠公年十五從麗太祖大捷百濟孫策年十八割據全吳子今年與孫策等耳父爲國從征子爲父赴亂不亦可乎遂引諸葛瞻卞壺子在軍中事陳其可從及行執筆草檄左右

我王父竟得無事家素貧竭力耕田躬負米養之當肉常不食曰親廚不繼吾何以肉爲及丁內外艱喪祭一遵文公家禮哀毀甚晨昏省墓不以風雨寒暑而或廢也鄉黨稱其孝呈書請褒吾父命不肖曰無實行而有虛名余實慚焉使汝出入鄉中得無嫌乎仍令廢舉子業允恒老將死猶不敢失墜復作而曰吾父未弱冠與李姓同學者共棲山房一日李閉篋視之亡錢百文意吾父曰人固未可信吾父徐曰適用之耳卽償之翌日有一僧自言其貸時李醉甚不省寺內咸服以爲有直不疑之風吾父始名夢徵其

改之曰景淑字仁美者老先生所命而取諸里仁之義蓋聞先生之言曰君生於三綱並出之墟帶得其遺風餘馥仍手書一確字與之自是吾父不敢自惰有小大學難疑答問以四敬扁其齋曰事君以敬事親以敬事師以敬事長以敬作文誠子孫諄諄以忠孝友悌爲訓辭此吾父言之大致也有德無命仁者之所哀苟得執事一言以闡其幽允恒雖今日死庶藉手以見先父於地下余曰孝爲百行之源而公實有之敬是一心之主而公所勉焉是足以不朽公余又何言允恒起而謝曰請歸而銘吾父金氏貫善

山其先蓋出於新羅而以高麗侍中宣弓爲上祖卽所謂順忠公高祖季賢官副正曾大父碩輝 贈參議大父寅鼎 贈參判父斗元以從征錄勲同知中樞外祖星州李尙悌縣監季俊之子公娶豐山柳氏草溪卞氏有一男二女男卽允恒女李雲鏡宋之灤普源應見鄭彥樞允恒子女李婿女蔡周憲張溫玉三子幼宋婿一子幼公以辛卯四月二十日生壬辰十一月十四日卒葬于鳳溪之壬坐原是所稱忠孝烈旌閭之地而公之舊居亦於是乎在柳氏祔銘曰惟孝與敬維德之基行實在已何慍不知是曰良貴

公議斯存誰其銘者先生之孫

縣監崔公墓誌銘

崔君錫慶受慶間寓余寒泉之洞與余甚相熟不幸受慶夭錫慶老日往來善談論纏纏可聽間語及經綸才諳必曰吾大人又嘗稱道豐陵豐原知人之鑑豐陵豐原蓋趙相國文命顯命錫封而於其大人有知遇之感云余又聞余叔濟恭氏之言其論古今人材猷亦必曰崔公崔公濟恭公之少婿而非苟譽人者余以是慣聞公蘊而惜其局於時不克展布其萬一一日錫慶泣而言曰吾父卒時錫慶年僅二十於

容儀猶不能詳况其才行之美又安得形容也今錫慶老且死深懼泯泯無傳敢藉手以請吾父諱德中字至叔崔出耽津自高麗平章諱思全傳幾世有諱鶴齡號栗亭有特行純德享慕菴祠諱四勿文科兵馬評事諱玎 贈左承旨諱元立節度使 贈參判

於吾父爲四世以上同知密陽宋忠南其外祖也以肅宗乙卯三月生表格殊凡聰穎絕人甫成童而孤躬耕鋤業書史屢屈公車乃從韎韐仕爲貧也戊子僉樞辛卯忠翊將甲午忠壯將丁未所斤僉使戊申南漢留營別將己酉熊川縣監辛亥慶尙中軍甲寅

長鬢縣監已未再任留營辛酉同中樞所斤則不赴  
吾父少落拓不遇而獨豐陵兄弟尹尙書趾仁最器  
之尹公之巡撫關西也請于朝辟吾父與張公鵬翼  
吾父歷審關隘作圖以進嘗隨使赴燕忽問我 穆  
陵御諱舉倉卒不能對吾父從傍言曰君父之名不  
可使舌人緇傳請退館書進虜人敬服其在南漢當  
戊申逾變束舟楫檢往來賊果以津渡令嚴莫通內  
應以致敗衄爲供豐陵以遮遏江淮褒其功 上亦  
久而稱之嘗忤於柄相至是以經畧使發軍欲中以  
師律管轄饋犒刻夜使辦時已報漏見者危之吾父

隨機措置更未卒而辦焉又條陳軍制糧餉矯弊之  
方于府尹金公尙圭多施行及再任燔鹽鑿池又圖  
夷險要害使見者如指諸掌前後設施蓋莫不爲國  
而惠及緇徒者亦多繪祠而撤之則至今飯祝云豐  
原趙公按嶺拜中軍營中失火及簿藏吾父獨先收  
外都錄公私賴以有考禁御兩軍更番無定制貧者  
偏苦卽逐邑計額編伍輪番後於湖南亦如之大臣  
白於朝遂爲通國之制在熊川一道久獄查決無滯  
人稱神明及瓜立石思之其除長鬢豐原又按湖南  
疏辟中軍授以壕塹之役吾父相基量石作機車以

便運功訖而石無羸縮豐原遂以中車名北門詩以志之曰賴有幄籌能使鬼常憐匣劍欲衝空圖畫麟臺將自愧似君才氣豈終窮太僕馬場歲患砦柵之費吾父稟提舉樹榆柳今其長林是也晚年挈歸廣州之龍溪日逍遙巖泉花竹之間或誦出師陳情表歔唏感涕常恨祿不逮養遇喪餘終日如孺子慕平生卑以自牧言若不出口而及其辨是非論成敗若燭照而龜卜是故居廊廟者莫不具車相邀要與計國事輒辭以疾十年不出洞以英宗甲戌閏四月十六日卒壽八十初葬龍溪移卜龍仁東幕洞負寅

之原貞夫人坡平尹氏先卒而祔護軍得雄女參奉仁碩孫也男曰致慶縣監女適李宜臣黃襲主簿致慶女尹東著李壻繼子普融女呂錫周宋堯叟閔塾金箕行黃壻子箕彥奎彥女金東覽縣監趙衍玉主簿錫慶之子曰洙敦洙張洙正洙晦洙康受慶女曰宋懋中李濟恭子壻曰秉及洪龍普也微執事一言百世之下誰知吾父者余固辭不敢當歷十數年未就今年春錫慶在砥峽以書來曰及我生不圖不朽吾目其不瞑矣余甚悲之遂序次其言而爲之誌銘

曰



混於鞅鞞而勝讀書之見處於帷幄而贊經國之謀其才則周乎事物其志則傑然丈夫在古無方公如時何治止一縣其命也耶

通政大夫李公淑夫人柳氏墓誌銘

在昔 宣廟壬辰倭酋入寇 乘輿西遷列郡多瓦解而閭巷忠義之士往往爲國致命夫死於君妻死於夫而一門綽楔樹風聲於百世彼食厚祿而守疆土一朝臨利害聞風逃相隨續者視此果何如人哉當是時也李公許樑世不識何狀而聞都城失守晝夜哭失聲欲以義旅赴 行在自念烏合之衆未可

與圖難鳩居之糧亦不足適遠乃率家僮及志士願從者數百人拒賊於井邑沙峴柳奉事希津公之姻戚也亦與之戮力同心誓以身殉國擊斬頗多從者稍振一日忽聞統制使李公舜臣露梁之報仰天撫膺而歎曰事去矣以將軍之忠勇而至此者天也奈何自是兵頓氣沮不意賊兵猝迫公大呼手弓射殺數十賊身被十餘創勢窮力單竟遇害其配柳氏高興人希渚之女在圍中賊脅欲降柳氏厲聲罵曰當難殉忠丈夫之志節爲夫從烈女子之行義寧爲劊頭之魂不作蠻貊之鬼罵不絕口賊大怒三截其身

而去家僮散而復合收公與柳氏屍葬于縣東月影山墓上有青白氣一朵經數日不散人謂忠憤所激也公生於 隆慶丁卯其卒在丁酉而月日未詳柳氏同日死事聞 贈公與柳氏通政淑夫人特旌之曰忠烈之門事載輿誌朝家褒獎之典亦至矣公字擊彥性至孝鷄鳴必盥漱省候竟日侍側怡怡如也及喪三年不啓齒盛暑不祛帶經雖功總之親亦必敦睦未葬者助之未婚者資之嗚呼內行如此此其爲殉國之本也歟又聞公天資英爽器識宏偉所與遊多豪俊而每誦志士不忘喪其元之語其平日志

氣槩可想也李出鳳山生員貞仁從仕郎敏孝其祖若考而世派失於兵燹以吏曹判書大提學文靖公諱隨爲鼻祖云二男之英之後後承不能盡記謁余銘者幾世孫德郎也銘曰

爲臣殉忠爲婦從烈盍觀綽楔一門雙節

副護軍安公墓誌銘

安生景朱自三山來使黃展汝仁紀爲介謁余於蒼下之室而曰我幾世祖護軍公諱灌字子清系出廣州安氏之居三山自公始方尤菴宋先生僑寓是地也公爲調其屢空詔諸子曰此大賢也汝曹可師之

華集 卷十四  
遂令就學焉又嘗與多士上粟牛二先生從享疏此  
吾世德也所與遊皆一時名公卿而子之先相國忠  
憲公自其先大夫晚悔公世好最深是以及公歿乞  
銘于相國胤子尙書忠肅公而未及就則吾祖有顧  
言使請于陶菴文正先生之門而又未果常爲子孫  
無窮恨今銘吾祖墓以卒我父祖未卒之志者將非  
子誰與托哉此景宋所以袖狀而踵門也余曰諾責  
之以先故其敢辭按狀高麗大將軍那傑是爲鼻祖  
歷十三世有諱綬殿中侍御史仍五世大顯有諱省  
密直提學入我朝全節不仕其孫曰彭命司成錄清

白於公爲高祖是生景祐星州判官與宋圭菴同禍  
卒于謫生寅別坐 贈吏參生克悌縣監其配完山  
李氏府院君忠元女以乙酉正月三日生公公氣貌  
清粹姿性仁孝縣監公甚愛之公自以親老無他兄  
弟遂廢舉子業專意奉養不離跬步及二艱哀毀盡  
制宗家貧無以供祀割與庄土不問其所餘一如親  
在時常曰我自勤力亦足以爲家平生不言人長短  
得失客至必手談曰汗漫酬酢易及人過雅喜酒亦  
不過一盃曰過則亂亂則必言其不當言所以不欲  
多又也儕友亦不敢強自相謹勅以言爲戒有窮急

華身集 卷十四  
者救之無親疎貴賤而待之以誠至其御家衆則嚴而不少饒所居雜蒔花竹白髮蒼顏偃仰觴咏興至在譔自娛几案亦必齊楚無一點塵俗氣人以爲地上仙縣以行誼聞于營又聞于朝屢擬官亦不屑而其爲副護軍以八十推恩也越二年丙午九月二十七日卒凡再娶文化柳氏咸昌金氏皆別葬公墓在南堀山坐兌之原三男長應龜蔭仕爲參奉次應寅應庚六女適宋必遠李敏道判官康融尹必謙進士李頥宋奎臨側室亦三男三女內外孫曾玄以下累百餘人嗚呼不曰德厚而流光乎吾知公碩果之報

其在斯也參奉使其孫太奭爲狀太奭臨死又囑其子行健而至今遷就猥使余當其役此豈偶然而然哉景朱行健之曾孫云銘曰

皓首林泉知德者寡賢賢爲大良貴在我我觴我譔我耕我鑿以優以游以樂其樂去仙不遠咫尺俗離非余之銘忠文之思

寧越郡戶長 贈參判嚴公墓誌銘

嚴戶長興道其貫寧越其居亦越越中小吏也其地微無可稱然距其沒已三百有餘年矣而公卿大夫士莫不誦其名而慕其義咸曰嚴公嚴公此曷故焉

蓋當 景泰丙子我 端宗大王遜于越越明年丁丑薨嗚呼尙忍言之哉時禍色急越人舉惴惴不敢近公號泣走獄街具棹而葬之族黨怵以禍公毅然曰爲吾君死所甘心也朴忠正已下六臣旣皆駢首就東市諸宗英懿親後先殲夷者且數百人獨公卒無死彼以死生禍福動其心甘爲不忠不義之鬼者其類能不泚歟及 端廟復位卽其葬而封之曰莊陵褒公忠 贈工曹佐郎加 贈至參議參判旌其閭醜享于彰節祠于忠臣壇皆 列朝盛典也墓在越之南八溪向卯之原其祠于蔚山之圓岡爲遺

裔在也按公實記公有子曰好賢好賢生和和之子希雲希齡希雲生善希齡生漢呂凡十數世祖公者多不能記然錄後之請自尤菴宋先生始而公子孫無見者世遂以爲公後絕竟不錄或傳好賢畏約踰嶺變貫爲慶州後仍居蔚還于越 顯廟九年始聞朝廷虔奉 魯陵魯陵者 莊陵也於是復其貫雖稍稍自言家世世不知有嚴氏真派在以此云其先無徵其生卒亦不傳嗚呼公於 舊君未嘗食其祿又非有私昵之恩一朝臨禍難掉臂而過之何責焉乃忠義奮發蹈白刃如就樂地以一身當大事微公

華身集 卷十四  
幾不免秋草寒瓊矣其爲烈何下於宋之唐珪哉殷  
三仁或生或死而夫子比而同之公之與六臣一體  
祭祀也宜哉銘曰  
三仁跡殊六臣義同萬世一杯伊誰之功勿踐勿夷  
嚴戶長封

退洞處士權公墓誌銘

先大父陶庵先生之門有曰翊衛司副率白水楊公  
吏曹參議大齋俞公隱居講學以學于先生者教授  
學者時則有權侯克達字能彥從二公遊蔚然有名  
聲人比之黃叔度叔度吾未見見侯爲人峻茂與之

言蓋真實博洽宜其爲南州一士也侯之先本金氏  
至太師諱幸有大功于麗賜姓權祠于安東安東之  
權自是世輝赫本朝有諱曉 端宗朝及第有夷齊  
志之淳昌南山隱焉是所稱南山晚隱後累世不絕  
冠冕以孝友著一時羣從舉於孝而官者八人古未  
有也曰錫在曰萬寂曰挺筠自號拙軒是爲曾祖祖  
若考妣潭陽吳氏瑞玉其外祖也侯生而資質殊凡  
九歲始自奮就學周年了通史又周年殆遍經書如  
虞書碁璿二註自以意通之旣長能時文古文各體  
於書能草隸出而遊場屋屢魁鄉解卒不遇命也始

拙軒公構退洞精舍爲子弟藏修久而易主且將圯至是仲氏還其直而重新之公與其徒講討爲樂嘗曰科與學不可無賓主之辨彼在天者固有命至其在我者求則得之是故以得失不自累負笈從師至老不懈以早孤爲痛後喪廬于墓朝夕號泣泣已危坐讀書鄉人士名其庵曰讀禮友諸兄得一味必分疾革營正寢旣成而沒實丙辰三月一日也葬凡三易地始終在梨樹洞從先兆也有所著大學圖說太極圖說解等書藏于家其徒慕之稱之曰退洞處士云侯嘗過余知川官居一宿談經禮見余所爲鑿井

說論其疵類甚詳臨歸以其子昺大爲請曰幸有以教之旣歸以昺大所書華泉齋三大字寄意復申前說又示其所自爲晚隱傳而謂將丐余幽誌後數年其從子衡大書來以爲吾季父有志有才卒不幸泯泯死去其生丁巳得年適六十其幽潛之德非執事發之而誰也又數年昺大亡侯之嗣絕矣衡大愈懼其泯沒請益勤余心悲之三娶金海金氏洪州趙氏慶州鄭氏鄭氏之父曰泰柱昺大其出也噫孝友繩其先不墜庭訓文學著于鄉屢登邑薦是庶幾乎在家必達而不能然者何哉然知不知在人而不在我

者耳我有良貴是猶可以不朽也銘曰

權氏于安太師伊始南山有隱採薇之志既孝既友  
自厥父祖惟科與學孰爲賓主我笈我書遠從于師  
不有君子斯焉取斯梨樹之阡有窈其穴我爲銘之  
南士之傑

學生李公墓誌銘

栗谷李文成先生嘗言趙靜庵有畏友曰嵩善副正  
正之賢可知公其七世孫也諱德屋字子厚勝冠負  
笈之花田學于吾王父陶菴先生先生手書無念爾  
祖聿修厥德二句仍敘栗翁之言而又舉其墓銘中

親賢篤學敬義夾持明其爲厥德以期勉焉公於是  
乎知有家學將日進而不已也不幸有志未就卒而  
葬德義之洞某向之原公舊居也嗚呼公嗣子晚曾  
以孤童成立能以經術聞與余生同庚居同鄉遊於  
文事久矣一日狀公德訪余于華泉之齋而託之銘  
曰晚曾不天十歲失怙今適六十一年矣而墓無誌  
平生事行尙湮滅不著不肖所以痛心也聞吾父幽  
潛者捨吾先生之孫而誰也余感其言而按其狀公  
系出 璿派以 世祖大王別子德源君諱曙爲始  
祖一傳而爲嵩善與己卯諸賢同被禍後 贈爲君



謚文憲文憲之後三傳而屬盡又三傳而至諱益炫寔生公會祖曰府使東老祖曰縣監文明外祖曰北兵使趙公相周十一歲出爲族叔父諱鳳瑞子同祖文憲而同中樞廷鄰監察之曰考以上兩世其妣孺人安東權氏此公之先系也前後配晉州柳氏無育全州柳氏生男一女二男卽晚會二婚柳樹申光簡晚會男龜世進士女金弘潤柳子女昌來梯來李永年申子在觀此公之後承也公天稟柔和風儀清淑與人無忿厲處事無機關睦於族而任於友周乎德而疎乎財自承先生訓誡之辭蚤夜孜孜衆技未嘗

接於手戲言不敢出於口其學以小學爲本以學的爲準及先生晚寓寒泉公家不數里近與其伯氏諱義屋暨同門諸公日讀書僧菴卷中尙有吾先子題名之墨其勤苦可按而知也然而猶自以喪威荐酷未嘗專意傳習爲恨愛敬所後若天賦然小心謹慎若初來之婦未嘗一煩呵責率二姊同居雖瓶罍鹽豉共有無庭戶無間言雖家至挫敗而不悔也寧傷於惠而不傷於廉好仁則優而惡不仁則不足奴僕感而不忍欺給隣里化而不敢鬪爭此其資性事行也生於 肅宗丙戌卒於 英宗甲戌之八月此又

其始終也噫余生晚雖未及升公之堂往往士友間  
有道語公舊實者今按狀其資性如此其志之篤其  
行之美又如此古所稱不問可知爲先生弟子者是  
耶余聞之有善於己卽食其不食必在於後余將以  
是徵公之爲善人也銘曰

傳家有業親賢篤學惜不假年以成厥德德義之山  
生居死墳命也其那勛武後人

### 孝子朴公墓誌銘

余嚮爲孝子朴公霽表其墓其子哉亦孤而幼事母  
如事父以孝聞嗚呼是父是子真可謂不忝其所生

也公字大才自其孩提常不離慈母側藹然有深愛  
一日問曰人皆呼父我獨有母母亦可以云父耶忽  
瞻慈顏涕泗洸瀾遂相扶大慟凡所以娛悅親意者  
無所不至母憂亦憂母喜亦喜苟有慈心所安先意  
承奉不待學而能之出則懷橘入則扇枕殆類古之  
孝子及冠而娶曰娶婦所以養親也萬一不能養又  
不能便其起居不孝莫大焉自是朝夕之饌必與之  
適其烹飪在其酸醎曰某是親嗜某是所不嗜一一  
先嘗後進親候有膈熱不能安於煖室日必躬爇薪  
火宜其溫清以爲常灑掃床簣不使有塵埃蚊蚤未

明屏息至戶外以候其興寢問其安否其有不安節雖或身在他所心動促歸每夜半浴其身潔其衣焚香禱于北辰至滿容而後已嘗糞驗差血指救急亦非一再又嘗旁通黃歧舊訣對證投劑屢獲回甦家雖貧凡服御供奉之須無不畢具常以不識父面爲至痛哀慕之色達於顏貌值夫日靜居致齊備禮行祀器品殺核務從蠲潔號隕欲絕明發不寐有時夢覲以其典型說與母氏輒泫然而涕每日先府君至行雖王哀之廢蓼莪高子臯之不啓齒未必專美於古而至今泯滅世無有知者此吾終身之恨也是以

人有稱公之行者公蹙然曰是皆子職分當然譽我常常行若是過情何待人之薄也辭氣莊嚴由是孝一字爲家內忌諱人無敢復言雖家人子弟亦不得一言稱道也甲寅遭內艱衰絰不去身朔望必哭墓慎終追養皆依於禮哀毀成疾祥後數年竟不起實已未三月二十一日去其生乙亥得年僅四十五其墓亦真巖先塋之麓配金海金氏祔御家有法承祀致虔隣黨莫不稱云公之先出密城大君諱彥忱世躋崇秩至太師中書令彥孚大提學允文爲高麗名臣入本朝六世簪紳至縣監景膺以文學政事見推縣

監生兵使五萬以武顯是生杰隱居篤修號情隱是  
爲公高祖曾祖祖若考曰敬春曰致龍曰霽也公二  
男峻峻生員三女適李承中南宮道李命祐長房一  
男早塲二房二子長亦早塲次有珍改名鈐卽請余  
文者鈐有六男銘曰  
維揚之山真巖之岡有封四尺孝子攸藏凡今之人  
毋或夷之藉曰不見知於人自有天翁者知之

是春窩沈公墓誌銘

沈氏青松大姓近世有諱師章字憲之者名其窩曰  
是春取邵子三十六宮之句以自號云公與余爲近

戚長於余四歲宜若相親熟而未也甲戌秋公之胤  
墩鎮袖公善狀而來求余爲銘余老耄不能銘其請  
至六七愈勤而迄未有以副也竊嘗博採于士友之  
間蓋曰是春翁杜門息交閒居以爲樂雖以親意兼  
治舉子業亦不屑也其爲安與公子之婿也視其富  
貴如浮雲田民貨宅自婦家來者一任孺人手不  
問其出入青平家將立後上下皆屬意於公公自托  
廢疾拒益牢議遂沮凡此皆公之高處其所與遊一  
時諸公多記其窩而贊美之盍觀於其所爲文其曰  
其言安而定其貌和而潛其視端而不忤其步詳而

不散其爲學約而不駁是豈襲而取之哉惟靜之故也者公之族姪定鎮甫所識也曰是春翁不類世人膠漆中態蕭然一榻默坐觀物真有閒中日月靜裏乾坤底意思者尹諭善得孚之記也曰公之德積於中而形於外溫厚慈諒爲中節之和無往而非春者趙參奉義達之言也是三人者皆博識謹飭之士其言豈夸哉向微士友之言噫其失此翁矣余又見漢湖金公元行近齋朴公胤源與人書有曰一接其儀清操可見又有曰世之詡詡喜馳逐賭名聲致富貴而自以爲能者若見某可以知愧矣是亦當世之實

錄也余於是參以羣公之言攬其狀而徐考之公資性言行有可以約綽彷彿焉者蓋公平生大致專在於孝兒時僉正公患痢久肛脫而幾於爛公泣而舔之凡七晝夜卽愈又患腫腹膨膀醫云宜白鼠膽公遍搜而默禱之忽見蠹椽自墜有二鼠穴其中皆白用之亦卽愈隣有醫性傲雖豪貴家不能邀獨於公不招自來曰天生孝童此嚶嚶齋金公用謙所謂孝能致醫誠能感神者也旣丁憂事母李淑人如事僉正公其七十而患痘也喉痰日盛證甚危公乃以藥丸自含之移其涎而賴以復常淑人年高怒詈或過

情公但整襟視膝起敬起孝得其悅豫然後言笑方自如其居喪也三年不梳首夏不扇冬不絮備新衣一襲留作齊服每當喪餘腥葷之屬絕不近口前期沐浴剪爪以自潔焉其遠祖墓皆在遠地而必往省焉搜輯先世詞翰手自編寫而葆藏焉常慕藍田呂氏鄉約定爲家式與同堂月一會講講訖必觴咏而暢懷夫孝所以源百行也篤於此未有不引伸而感歸於善故其溯推而旁達皆此類其資溫仁其容和粹其心醇精其所言所行自不失儒門軌範噫非有所存而發於外者能若是乎公在童丱受學於李公

惠輔李公又學于吾王父文正先生門路淵源固已得其正而晚好濂洛羣書有闡然自修之美探索蘊奧蒐羅訓釋蓋將彙成一帙而未及云公雖不切切爲學吾必謂之學矣者余於公亦云然且聞李公之子遠配嶺外公托遊觀歷婦兄李公鎮翼任所得所贖五十金盡與之而歸或有危之者公曰吾以吾師之故也李淑人在世嘗以私庄別給公受而有之幾三十年見宗家挫敗遂還其券于宗姪俾奉先祀雖其家貧益甚顧不以爲意也有素不識孤貧者遭親喪九日不斂公腰錢往以賻之公常曰蔽體充腹不

廢天職而已其疎財好義固亦可見旣敘公事行而結之以先系後承麗朝文林郎衛尉寺丞諱洪孚其上祖也入我朝官左政丞謚定安諱德符其十三世祖也越三世有諱璿號忘世亭京畿道觀察使光廟卽位棄官自靖先輩以爲可與六臣同傳又三傳而有諱光彥號鈍菴文科官議政府左參贊爲明宣際蓋臣生諱鎬早占司馬有隱德高行與退溪聽松爲道義交以遺逸屢徵不起世號逸齋先生史稱西湖處士 贈大司憲爲伯父安岳公諱光門後無嗣又取本生從子宗敏爲後號晴灣卽竹西諱宗直

兄也師事栗谷官牧使以學行 贈吏曹判書生諱倬號恥軒以經學進官至監司 孝廟特贈參贊命禮葬寵異之生諱之涵號默齋同春宋文正先生秉銓首薦經術通明拜繕工監監役諸大臣請白衣出入經筵事未行而卒 特贈大司憲又無嗣取再從姪壽堅爲後監役 贈吏判以賢孝稱與吾王母洪夫人爲舅甥公與余所以爲戚耳生諱廷儀司馬官掌樂院僉正是公之考也妣曰原州李氏諱薰女公以 英宗辛酉十月十九日生卒於 正宗癸丑亦十月而二十九日也李孺人辛亥先卒而葬楊州之

九仙洞翌年春以公柩卽其同岡而權厝後七年已未並遷祔于廣州之初月面雙嶺里亥坐之原而孺人右焉生一男一女男墩鎮娶承旨申光緝女有幾男並幼女適金在壽銘曰

孝能致醫誠能感神溫厚慈諒無往非春閒中日月醉裏乾坤非余爲銘諸公之言

進士黃君墓誌銘

我王考陶菴文正先生之門蓋多四方遊學之士而大司諫黃公幹少時亦從之遊先生以公姓諱同於勉齋書贈勉勉齋三字以寓期勉之意君其嗣孫也

名基瓚字大中年十六爲吾婿一日以贄來曰父命也余戲之曰我非朱子子安能爲勉齋仍以勉勉齋故事勉之君善讀書音韻洪亮文理長進其辭氣初若俚俗而力變之步履始稍傾仄而造改之惟余言是從余甚喜其進未已也性又喜山水伽椰金烏俗離華陽吾所之君未嘗不偕其相與之樂不徒以舅甥之親也已而與吾兒共登國庠余在黃岡聞喜行到東坡二新恩以白牌欄衫迎拜馬首仍與榮掃屏山我西而君南覲時君父母俱存兄弟無故吾女亦無恙膝下有五子女顧其年董二十七人莫不艷稱



不幸吾女死而昨年君又死嗚呼何其酷也君大人  
展汝仁紀泣爲狀屬余曰逝者之於子恩是舅甥義  
則師生銘吾兒者捨子而其誰哉余不忍辭君生於  
乙未十月廿二日卒於癸亥八月廿八日吾女女士  
生卒皆先一年已葬於報恩芝山先麓及君之葬有  
術家忌權厝其傍以翌年甲子四月穿其右而合祔  
嗚呼君生而骨清氣秀嬉戲紆緩迥異凡兒四歲見  
屏間有畫雪筍冰鯉問彼何爲也大諫公曰畫孝子  
事也又問孝子何謂也曰愛親敬親之謂也曰人人  
皆不當若是耶何必畫爲大諫公大竒之鍾愛甚翌

年大諫公下世號呼啼泣感動傍人常侍祖母金夫  
人側受讀小學不離左右其姊沈氏婦喪年方八歲  
而入而寬譬父母出而應接賓客見者莫不感歎及  
金夫人喪袒括之節簋粥之度一視其大人所爲未  
葬不脫經帶未練不御厚味不復于寢冬不衣帛暑  
不服苧厚於宗黨篤於故舊做事平坦不知有機關  
秉心子諒不欲設畛域遠近親疎一以誠信待之平  
居無疾言遽色雖奴隸之賤不加以聲色或有失從  
容諭戒期自愧服筆硯書冊必位置整暇無一點塵  
埃蓋其天性然也與人言言若不脫口而剖析曲折

開示義理或引援古人格論間以風俗詼諧聽者若  
飲醇也母趙淑人素抱貞疾每涼燠遞序朝晝異侯  
必如期而發君預備藥物貯之篋笥供奉救護不委  
婢使如便旋之器或手自淨洗遇先忌雖在觀志之  
日坐齋必着上服佐而視具凡有霎時出入微物假  
借亦必稟于大人無少專擅及君病閱歲危欲駸駸  
羸憊至於莫可起居之境而恐其憂兩親日必盥巾  
夷然若無疾痛撫愛穉弟真誠款翕病革摻手而戒  
曰無貽父母憂也其死前一日猶自起省母出而澡  
浴更衣語傍人曰吾死矣使我老親天寒遠道奔走

葬埋是爲不孝翌日庚寅正席而終知不知咸曰善  
人亡矣嗚呼惜哉君系出昌原始祖諱忠俊高麗侍  
中入我朝諱居正刑曹判書下九世簪組蟬聯諱鏞  
僉正辛丑棄官歸隱于俗離山下是所謂芝山諱運  
河知中樞卽君高曾兩世而外祖咸安趙翼鎮也男  
曰鍾羽曰鍾林出後曰鍾爽曰鍾奎并一女幼吾女  
將別有誌姑以是銘君銘曰  
事理通達顧其外則恂恂若無能氣宇軒昂存諸中  
者休休如有容才之美行之篤而獨不得其年嗚呼  
大中女士偕藏四尺之封



